



空明先生集題辭

混茫二炁密於織中有空明人不識空明先生
領下驪珠輕探得等身著作直偶寄絕豔驚才都妄測
披編未獲尋根源僵走汗流枉費力愚蒙善病悞工夫
猶領先生真氣息仁心既足益太虛浩氣且將凌八極
何物貪鴟嚇鷓鴣君子無爭爭本色翩然辭紱賦歸來
已爲宮墻懸準則門前五柳眼常看堦下三槐手親植
神仙自鍾神仙嗣六齡便解驅文墨梯几拂紙炯雙眸
臨池運腕工虛實鄴侯骨節異尋常方圓有賦藏胸臆
我來拜訪喜見之此樂人間不可弋逃禪居士且漫叅
莫道空明是昏默

撫空尚志
空明先生
集題辭

庚子冬仲長至日率呈

景翁先生并贈 令嗣延年世兄卽求教政東浦後學
顧成天良哉氏具草

空明子詩集卷之五

壽春兄鐵岡先生選

華亭張

榮景桓著

答和王京客贈言原韻

自笑疎慵甚何堪叨問竒片言成錦繡五色見紛披却
怪雕龍手來尋沒字碑一塵真不染遠隔庾元規

黃梅樹下

自此以下用上
下平各十五韻

盛夏綠方長黃梅葉覆空碧陰當曲檻老榦傲薰風烈
烈炎熇隔疎疎涼氣通只宜衡泌客旦晚坐其中

玉蘭

玉樹栽窗外森森綠葉濃絕勝君子竹不數大夫松只
合迎朝旭還宜對晚峰謝庭春更好九畹碧茸茸

雙桂

靜院無人到簾前桂樹雙風搖枝打壁月照影窺窻葉
密棲黃鳥花開倒玉缸長吟招隱賦壯志若為降

天竹

一片丹霞落誰知在竹枝未容蜂亂採宜有鳳來儀粒
粒胭脂重離離鬼面竒其種不一有狐狸尾及鬼面者為佳綠窻雲重夜
紅豆寄相思

海棠

煙籠春正好風暖綠成圍灼灼紅英見翩翩粉蝶飛
牆窺宋玉醉酒困楊妃著露增嬌媚無嗟與世違

石榴

佳種來安石天漿味有餘樹高喧鳥雀花豔勝芙蓉
若稱無媿金罌名不虛離離成實後碩果得相於

玉簪

又名白鶴

誰碾羊脂玉簪成雪不殊異香苞素萼長頸淨冰壺露
滴蛟人淚光浮明月珠宛然華表鶴引得百千雛

魚子蘭

即珠蘭

汲水頻頻灌紛披綠不齊花疑魚散子香類麝含臍絲
弱如垂釣煙輕恐污泥夜涼須露潤移傍小窻西

金梅梳花

一種真黃色如梅韻更佳正宜簪寶髻恰好伴金釵鬢
共羣芳亂花還密葉偕片時風雨急零落滿閒堦

淡竹葉

未見琅玕影萋萋已覆苔葉繁多似竹花老不含胎豈
得干霄漢還愁沒草萊化龍無復望或恐鳳飛來

建蘭

梯航來閩越盆植等竒珍不耐三冬雪還藏百晦春玉
苞含遠韻劍葉拂芳塵豈比生空谷徒勞君子紉

翠雲草

小卉生墻背重重長翠雲雨餘青靨隼煙動綠氤氳疑
滿藍田玉還同織錦文堪偕書帶草陪伴矮窻芸

斷腸草

即秋海棠舊傳思婦憶夫灑淚化草故有是名

獨立空庭內胭脂着淺痕垂垂堪下淚種種欲消魂對

景悲長夜懷人隔短垣別離無限恨腸斷近黃昏

萱花

誰樹忘憂草嫣然一色丹枝枝緣石砌楚楚傍雕闌採
得充珍膳烹來媿素餐願言聊結契三徑好盤桓

雞冠花

五德傳來妄雄冠立草間孤身常矯首羣聚若開顏窻
畔何能語籠中那會還更殘鳴不得愁絕度函關

鳳仙花

一名好女兒花

宛然好女至粉黛滿窻前麗質開晴日芳姿鬪曉煙
來儀綵鳳疑下散花仙不識誰評品徒令菊婢傳

茉莉花

茉莉堪消夏空庭著意嬌似梅花較大如雪韻偏饒靜
坐月侵帳微涼螢度宵落英宜綠鬢折取贈紅綃

初生黃楊

舊傳黃楊一年長一寸逢閏縮一寸今初生逢閏不知作何光景故有是詩

初生遭閏厄安得地成坳若使重歸柢何如不露梢片
時看葉長隔歲見枝交千載經過此懸知鳥鵲巢

蓬蒿

柴門終日掩門外長蓬蒿不數空山李全欺別院桃捲
簾青入障對雨綠翻濤一盞松花溜珍珠滴小槽

楊花

似憐雪作骨不藉玉爲珂趁日和塵滾隨風隔水過顛
狂迷遠樹爛熳點輕蓑看爾何時定蕭蕭紅雨多

燈花

烈焰燦竒葩堂虛月影賒何須沾雨露隨意吐萌芽共
道如紅豆誰知是幻花一燈長不滅相對度年華

雪花

同雲飄瑞雪六出散羣芳玉樹沾瑤粉梅花發澹香和
風窺北牖含態過東牆掩映河陽縣裝成淺淡妝

風花

我愛封家女司花最有情似濃還似淡如笑更如礮朶
朶雲生夜翩翩日照晴迷離看不見魂斷在江城

雨花

帶霧飄深院因風下小庭時隨桃李豔不數柳槐青脉

空明子詩集卷之五
脉愁無限濛濛苦未醒落花同悵望寂寞隔前汀

浪花

梅雨潮爭長江流高幾層輕翻數點雪遙蹙萬條冰霞
落紅初斂風迴綠乍凝一帆飽渡處疑有白雲興

油花

貯得清泠水輕拋點點油旋成蝴蝶舞倏變杜鵑愁生
滅盆中見飄零波面浮因之增感慨肉食可無憂

虛花

共說花堪羨爭來處處尋一宵紅雨後滿眼綠陰深尚
有流連意還存去住心自從零落盡目斷楚江潯

空花

花向空中覓空從何處探有甘還有苦無色即無貪既
識波心月何勞雲外龕鏡中一例看莫笑老癡憨

鹽花

弗謂淡無味花生一點鹽撒來同舞雪煎去不空拈豈
以珍羞重寧因蔬食廉舌尖殊辨得辛苦到頭甜

天花

盡道無私覆栽培見至誠有時開爛熳隨意落塵凡說
法諸天護盈庭龍女監乘槎如可問我欲挂征帆

答和宋又韓原韻

自愧膺師席何來啓絳紗名賢口吐鳳多士筆生花經
術羞唐庫支機愧漢槎鴻文欣共賞不覺日西斜

空明子詩集卷之五
五
答和張玉田原韻

垂老膺師席羞稱絳帳開
壘鹽隨分度首肯傍簷栽
識破幻中幻寧知才不才
十洲天外遠何處覓蓬萊
世路真難涉儒家敢自雄
人心圓似月天道曲如弓
對客眼常白傷情淚欲紅
談詩并說劍幸賴黑頭公
海外風偏厲經秋便覺寒
况兼齋更冷無奈興先闌
蜃氣冲銀漢珠光落玉盤
瓊瑤承見賜五色散雲端
三載頻頻晤憐君鬢亦秋
罇壘虛北牖酬唱坐南樓
不料崇川去常懷谷水遊
豈緣雞肋絆為爾促歸舟

早桂為家牧自賦

叢桂交秋茂尋芳到草橋
天香初放藥暑氣未全消
蘭

佩堪陪馥荷衣合助嬌
問誰誇獨秀宜誦小山謠

立春日曉起

雨聲催曉夢春到小窻前
人淡常如佛官閒竟類仙
兔毫含月露龍尾煥雲煙
對景看雙鬢驚傳又一年

賦得人淡常如佛

茹齋終不厭戒酒亦何妨
聞見真忘我空明別有鄉
大千聊對景函丈獨回光
亘古常如是天花下曲廊

賦得官閒竟類仙

把盞殊無量揮毫獨有神
渾忘五百歲空說八千春
局外同游戲場中肯認真
可憐人世上車馬動征塵

戲作全首對句

得馬何須喜尋羊不用悲鹿亡因夢覺魚樂要誰知庭
下千年鶴枰殘一局碁片雲嗤變幻獨月笑盈虧

咏懷戲作首尾用對句中四句用散行語

儒術嗟何有官方愧未諳悠然念松菊蚤晚謝朝簪欲
究真名理尋雞窻下談憑吾窮義蘊任爾笑癡憨

懷陳用霑黃子微徐附覓五六句戲作散行語

話別無多日相思已半年獨憐身有疾反笑世無緣松
竹乘涼夜微雲澹蕩天此情忘不得回首意茫然

渡海

渡海真無味

皇程敢自由放開膽似斗衝破水如油

我道從茲北

君恩藉此酬一天飛雪下蘆荻點輕鷗

夢

一枕神遊處依然也笑顰是生還是死疑假更疑真我
亦閒觀化誰能解問津莊周化蝶後此意杳無垠

自憐

四壁供幽賞琴書樂在中拂簾紅杏雨侵榻綠楊風五
字經三捷千言掃一空獨憐鸚鵡舌剪翅鎖雕籠

告假歸里作

莫笑青氈冷歸來便不寒親朋推繡虎屈宋作衙官臘
酒浮瓊盞春燈照玉盤東山觴詠興豈獨謝家安

錢

穆公權子母元道識乾坤鵝眼傳來舊鮫文化去新果

空明子詩集卷之五
然能使鬼共見可通神幸遇岑文本清談也快人
戲示兆熊

笑汝喜藏書我意何須讀開卷百千萬閱歲五十六却
怪眼漸花可憐鬢已禿莫學老蠹魚早食 天家祿

巳亥除夕

積雨經旬後逢除乍轉陽風回晴日暖梅帶晚雲香奠
酒酬詩思燒松熨熱腸賣歎真絕倒如願亟須償

庚子元旦

共飲屠蘇酒羣歌舜日長履端祈 萬壽增祿話咸康
聖德恩無量臣心樂未央太平無以報相與祝農祥
早春為章鳴岡賦

柳線將回綠潮痕潤碧磯勾萌新意長古木老煙微蘆
筍穿沙嫩萱芽護土肥嬌鶯初出谷求友故飛飛

和大總戎陳公春日十咏原韻

拂水驚梅後風回六出斜玉人披鶴氅琪樹吐瓊花道
蘊方吟絮夷光正浣紗柳條禁不得愁絕欲歸鴉

掩戶排寒入狂飈肆厥威鶯聲遲嫩柳鴉背曝斜暉樹

老梅初放杯浮客正歸漸看風轉蕙桃李鬪芳菲

春寒

花信多風雨烏衣漸漸忙濕雲籠樹矮濃霧鎖波長消

恨無竒策澆愁有別腸何時晴日麗相與踏春陽

春陰

臥聽鸚聲好晴陽那覺寒和風煦日麗春服試衣單錦
帳花千樹冰輪月一團醉吟真得意詩思入毫端

春煖

春色開晴甸緣溪徑自芳嫩紅多別致淺碧有餘香拂
拂煙籠柳條條風動篔簹花開歸路好緩緩不須忙春色
曉窻迷宿霧長日正遲遲似雨桃千點如煙柳萬枝官
箴誠不忝 帝德果無私早起籌農事連歌七月詩春曉
蘭玉迎朝旭韶光一派新花明爭曜眼葉嫩不凝塵共
仰如輪日咸瞻有脚春敝衣甘學道原憲肯言貧春光
獨坐消長晝何須事遠遊且看桃藥綻還愛柳絲柔啜
茗堪清肺攤書聊注眸閒愁何處寫幸有仲宣樓春晝
花影搖窻紙旋疑不夜城一燈嘗伴讀三盞敢移情布
被心偏冷蒲團慮自清願言參至理無臭亦無聲春夜
黑甜隨我願白日竟荒荒花落春應老簾垂晝自長悠

悠魚泳樂栩栩蝶飛忙識得其中趣誰能計稻梁

春睡

附五言排律

答和龔聞天原韻

每慚才抱拙豈得地邀靈濁酒臨風酌新鶯傍柳聽未
能成豹變無奈弋鴻冥樂道修天爵安貧愧德馨五雲
招閣史一卷誦黃庭待得還童日驚看兩鬢青

次倪文九原韻

白雲空鎖洞顧影愧山靈况更違親串安能忘寧馨懷
中徒鬱鬱頭上已星星往哲師廉潔先賢示典型沉潛
五千字荒廢十三經不作華胥夢常吟陋室銘愛花期
共賞喜雨約同聽析理如攻壘揮毫若發矟何須悲弱

空明子詩集卷之五
九
質空自羨遐齡弘景還餐蜜初平竟餌苓一燈期與續
解組謝 明廷

空明子詩集卷之六

壽春兄鐵岡先生選

侯家

華亭張

榮景桓著

侯家亭館作經年清夜追歡奏管絃萬錦橫遮花雨畔
衆香浮動鬢雲邊簪遺珥隨飛金雀翠繞珠圍舞絳仙
三疊霓裳歌未竟隔簾明月到華筵

獨酌懷樸村大兄

且喜牀頭春釀新三杯獨酌任天真花開定待邀明月
詩好常期賞故人有興捲簾消永日無言靜坐遣閒身
幽居雖未離城市肯惹纖毫一點塵

學道

未能逃世入空林一任踈狂臥柳陰已往良緣隨逝水
近來好夢付單衾琴樽結契塵心冷猿鶴相依道念深
身是玉皇文案吏恐勞黃鶴漫追尋

戊戌元夕前五日見馬燈忽動尋梅之興

澹澹疎星雲影籠馬頭然燭映街紅原知伯樂驪黃假
且酹劉伶酒盞空未到上元燈寂寞已違正旦月朦朧
相思苦憶林和靖一樹梅花淺水中

十三日試燈

連宵礎潤白雲凝月色模糊望不勝纔過上旬三日雨
先看元夕九微燈一枝梅影橫窻瘦幾點霜花帶雪冰
把盞莫辭蠻酒膩賦心老健似蒼鷹

東風習習惹愁霖未過元宵夜漏深燈火漸從更次滅
酒杯還向座中尋女隨母畔纔停繡兒坐翁旁也學吟
慈愛友恭天分定莫教辜負此時心

柳

無端萬紫與千紅那及垂楊覆碧空絲挂綠窻來鳥語
花飛錦陌奪天工腰翻楚女斜暉下淚滴隋隄暮雨中
小樹不禁攀折苦明年爲爾伴春風
妝成碧玉傍危樓結得桃花作勝遊幸有垂條牽客袂
漫勞飛絮逐波流聲吹絕塞添新淚汁染宮袍愧敝裘
彭澤遺踪應不遠正須搖颺點芳洲

與李節珊夜話

論文午夜酒初醒太白由來是謫星雨打閒窗渾不管
笙吹別院有誰聽繁花寂寂銷殘粉一盞熒熒照素屏
門外溪山春漸老那堪重念柳條青

讀楊妃外傳

玉環生長出弘農作配王家入禁中豈料惠妃沉曉夢
却來壽邸覓驚鴻舞低楊柳樓頭月歌壓芙蓉水面風
千載傷心同一轍新臺遙接太真宮

金釵鈿合授良宵親向妝前賜步搖錦繡有人呈技巧
珠璫無意戴雲翹錢頒脂粉三姨貴樂奏霓裳一曲嬌
榮戟重門連五宅莫憎生女動歌謠

深院梨花漏月痕却因忤旨出宮門笛吹紫玉誰憐我

髮剪青絲欲斷魂昌裔被搗遭異罰祿山賜坐接殊恩
分明記得長竿舞劉晏詩成酒未溫

梨園樂部暢天顏舞倩伶奴謝阿蠻秦國纏頭三百萬

桃娘玉臂曲彎環

南唐詩話載徐鉉一絕云玲瓏寶釧曲彎環玉質金鑲點翠斑高挽綠雲

擎素手鏡中遙映黛螺鬟

琵琶紋細成金縷芍藥香濃醉綠鬟莫訝

清平推絕調花箋勻灑墨痕斑

江陵進橘色凝丹命種蓬萊結合歡樹底含霜張翠幄
枝頭爛日擲金丸實如一體香浮酢果類同心味帶酸
宛轉賜緋成采戲雪衣憐殺曉鷹殘

猪龍造亂動征輦驛路空驚枉噬臍僊觀初非求解脫
佛堂今已證菩提香囊遺恨應沾血紫褥封肌恐汚泥

惆悵馬嵬山下土一坏煙鎖綠萋萋

蜀道崎嶇路不支一軍駐馬意何之欲除國賊存宗社
請割私恩謝六師花落却教愁粉黛鳥啼應爲哭胭脂
劍門山水還如昨最是傷情進荔枝

通幽何自識飛仙特跨蓬壺到海天樓閣鳳巢青桂鎖
洞門鶴立紫藤纏釵鈿半贈完前願牛女同盟結後緣
寄語上皇無自苦可憐長恨一年年

答贈焦廣期徵君

柴門晝掩靜無人三逕幽深氣象新沙鳥塘邊閒覓食
海雞窻下漫司晨繞堤垂柳千枝秀護筍疎籬一片春
日暮臨淵思結網何妨獨繭暫爲綸

揮毫落紙語驚人吐故還應更納新白鷺波間栖斷岸
黃鸝花底話清晨莫誇李愿歸盤谷直似嚴光隱富春
治世才高須借箸渭濱豈合老垂綸

君是羲皇以上人北窻一枕白頭新笑看黃卷今猶古
靜對青燈夜嚮晨堂廂樓高堪望遠鳥啼花落獨尋春
窩名安樂真長策肯學淮陰下釣綸

老我江鄉作散人輸君詞藻倍清新劇談一世如殘夢
尚論千秋等隔晨雪捲銀濤初漲曉雲迷澤國古塘春
蒲輪不起東山臥辜負蒼生謝鳳綸

同魯亭姪踏青郊外

春山無際水空流嫩綠紛披野色幽紅杏日邊留過客

白雲天外見孤舟，休將別恨悲遲暮。贏得新詩喜倡酬。
莫道郊原難選勝，陽春花暖卽神州。

旅館遲吳幔，亭內姪逾期不至作此迫之

淒風苦雨落花朝，綠暗溪頭春色嬌。燕剪不來空目斷，
鶯簧漸老更魂消。板橋有路千回合，樵徑無人一線遙。
明日莫遲江上約，海潮新長兩三篙。

憶先室吳孺人

海棠昨歲又呈妖，冬日花開太媚嬌。自愧德涼消不得，
轉思愁苦總難描。空庭月落鴉棲樹，虛室燈殘鬼度宵。
吟到大招應有恨，傍簷梅影拂窻棂。

抱大兒兆熊得句寄奕山弟

無題可作詩千首，得句聊吟花一枝。對卷暗期窻外月，
引雛偷摘鬢邊絲。素心竊擬真如水，傲骨由來竟似癡。
此際此情誰解得，箇中惟有阿連知。

早春懷膠城李西閨姪壻

日午同人約踏青，青青回蘆筍透沙汀。柳梢放綠垂官道，
梅萼凝朱傍草亭。宿酒未醒如夢寐，新鶯初轉似丁寧。
虬江一水情何託，目斷雲山列翠屏。

花朝同家阮昆池作

春到春來花漸饒，春來今已值花朝。慚無焦尾琴堪鼓，
幸有扶頭客可招。清渚泛舟雙槳捷，綠堤走馬一鞭驕。
奈他風雨連晨夕，冷落寒梅到斷橋。

空明子言集卷之六
五
小門深巷遇花朝萬葉參差破嫩條梅瓣不須憐皓月
柳絲何必蕩長橋半簾晴影紅初試一線春愁綠未驕
生怕韶華同過隙漫攜短笛度中宵

仲春大雪

中春飛雪滿天涯隔着珠簾認欲差芍藥因何蒙柳絮
杜鵑爲甚變梨花水晶宮殿看常近白玉樓臺望不賒
此日山陰難訪戴西施且莫浣溪紗

蝶

翩翩風致繞簾幃閒向湖山曬粉衣芳草岸邊時點綴
落花溪畔見依稀夢迷莊叟魂應化圖譜滕王態欲飛
莫學狂蜂狼籍甚麗人頭上戀芬菲

桐橋卽事

溪流婉轉動輕雲茅屋臨流傍此君樹密含煙山欲碧
風迴蹙浪水生紋游魚上餌驚竿影飛鳥忘機噪夕曛
陌上花開歌緩緩飄飄腸斷六銖裙

懷伊章五姪

憐爾潛踪寂寞濱窻前風雨動經旬案頭猶喜堆千卷
門外何曾見一人睨睨黃鶯聲帶澁呢喃紫燕語空頻
可憐兀似騰騰醉辜負花前桃李春

坐隱懷章鳴岡

小山新綠漸芳菲約伴臨淵看落暉榆莢有錢難買醉
楊花拋絮不成衣獨憐怪石如人立那更清泉帶雪飛

攜得蒲團常坐臥晚霞引月到漁磯

訪芟蘆室曉峰禪師

臨窻對景求真樂靜掩柴關晝漏長風急幡飄荒寺冷
春酣花發野塘香喬松壓屋凝新綠流水環門下夕陽
我欲逃禪叅半偈隔林黃鳥奏笙簧

同子女花下閒耍

漫同子女此徘徊一事無成豈足哀頭髮漸衰看漸禿
心花難養更難開且隨日暖添新况聊散春寒斟舊醅
寂寂棠梨誇爛熳惟餘鶯燕過牆來

六十誕辰

可憐垂老竟無成獨對良朋肝膽傾書鬪陸巢誇竹簡

調高郢雪奏金聲碧山砥行堪攻玉白鳥忘機早訂盟
珍重花前舊知己放歌應不笑狂生
釀就和風麗日天恰當上巳散晴煙花纔放後添詩句
鶯乍啼時代管絃笑我初逢六十度游仙還許億千年
無言便是長生訣叅透真如莫浪傳

金閫程氏山莊小飲

一棹紆迴路欲迷飛花狼籍半沾泥橋連竹逕通幽壑
月倩桐陰照短堤把酒漫看山拱北賦詩不覺日沉西
疎狂自笑生涯拙歸去聲聲杜宇啼

登龍華塢

昔日曾登此塢顛重來眺望益淒然鼓鐘冷落僧行脚

浦溆盤旋浪拍天古道石梁松檜外荒村漁艇鷺鷗邊
新鶯莫更啼還續敗瓦頽垣鼠雀穿

答贈顧湘九

牙籤玉軸正堪論五柳高風日涉園豈假九峰聯酒社
尚餘十畝傍柴門談天說鬼詩千首臥月眠雲酒一尊
爾我會心真各得郵筒取次展溫存

答贈錢介維

雙鬢何愁白似銀杖頭錢少獨逡巡湖山不阻登臨興
天地偏容疎懶人便有詩囊隨處帶每於酒盞倍相親
並非絕物甘逃世撲面難消十丈塵

同昊霑四姪夜泊得勝港

喜同小阮對芳洲漁火朦朧古渡頭聞道當時曾滅寇
可知今日自安流扁舟夜月魚龍嘯古墓松風鳥雀愁
從此南人不復叛年年海外奉琪球

登吳山酒樓望越山

踏遍巒岈第一峰開襟聊臥綠陰濃江流朝暮喧城郭
梵宇參差聽鼓鐘出柳笙簧鶯婉轉燒香姊妹語從容
四明無限佳山水欲去還留意緒慵

尋澱山古剎

浮雲出岫遠山連樹杪啼鶯聲轉圓蝶粉試衣妨曉露
柳絲搓線拂晴煙春風送暖遊人醉畫艇迎波芳草妍
杖策獨尋湖上寺繡牆苔蘚敗藤牽

答贈惠白禪師

路轉斜橋小徑東，雙扉掩映茂林中。
晚風乍起松濤壯，新月平臨佛火紅。
誰信萬緣俱是幻，須知一鉢亦歸空。
支公招我頻頻過，打破禪牀證六通。

增灣老人留飲有作

何緣蔣徑久流連，雄辨高談笑語偏。
却喜客如梁上燕，反疑主是橘中仙。
輕雲妬月來窻畔，急雨催詩到酒邊。
砌繞芝蘭香入座，一枝玉樹更爭妍。

平原村弔古

平原村裏獨徜徉，把酒臨風奠一觴。
冠世才華張老戒，乘時作用謝君揚。
功名絢赫如朝露，文字珠璣空夜光。

莫向讀書臺上望，華亭鶴唳恨方長。

索醉

陰晴不定晚蒼蒼，浦上遙看鴈幾行。
春水漲消沙岸白，薰風吹老菜花黃。
小桃夾柳臨官道，孤犢緣籬臥夕陽。
共說村醪能解渴，入門先向甕頭嘗。

華涇

華涇客舍晚淒淒，數點孤村望裏齊。
山寺掠雲荒犬吠，海風吹雨亂烏啼。
大夫五樹凌空老，君子千竿壓屋低。
最是近來添肺病，不堪潦倒醉如泥。

過蓮花庵

稽首蒲團禮法王，紫藤花發遠茫茫。
蕭條山外鶯千箇

寂寞溪邊柳數行，貝葉精參大士意。蓮臺現出美人妝，
獨憐隋落娑婆苦。共羨西方樂未央。

狂歌

半晴半雨過清明，攜杖狂歌見者驚。天際微雲粘遠樹，
岸旁細草上孤城。前年曾憶吟驢背，此日空來聽鳥聲。
漁父渡頭須動問，溪山指點好同行。

午窻閒咏

怪石玲瓏傍茂林，閒房午漏正沉沉。疎慵冷性終難改，
潦倒衰年半不禁。花意蕭條春漸老，苔紋剝啄雨相侵。
輸他紫閣兼黃閣，贏得長吟共短吟。

行樂吟同章良遠賦

辜負良辰興轉孤，客來勸我覓方壺。好花豔色開三徑，
明月清光散五湖。可免大風悲唳鶴，不勞全樹賦啼烏。
急須行樂猶嫌晚，霜上頭顱雪到鬚。

質疑寄樸村大兄

判然邪正分岐路，真偽從公事不虛。騏驎必逢伯樂賞，
瓊琚原待卞和譽。西山薇蕨愁無限，陋巷簞瓢愚有餘。
一餓首陽一旱天，天教跼壽復何如。

聽雨介山二姪適至

獨坐蕭齋聽雨况，阿咸啓戶話從前。閒敲玉韻疎櫺外，
細滴蕉心小閣邊。花柳大都風霧隔，關山應與水雲連。
姑蘇風景秦淮月，惆悵無端入暮煙。

憶得隔歲寒食訪慎微上人

寒食春深日乍陰
虎溪隔歲偶相尋
碧桃一樹侵禪榻
黃鳥千聲雜梵音
撼柱江流聽括括
門對跨塘橋水遮
勢最爲泛濫
村柳浪看森森
何時重訪圖三笑
不盡年來感慨心

微雨懷家阮匠門檢討

微雨沾花自不禁
柔情脉脉濕雲侵
嬌紅深染胭脂朶
嫩綠高抽碧玉簪
池面游魚吹荇帶
陌頭芳草豁塵襟
靜觀物理誰能道
一曲還須公子吟

浮家示映璿陳甥

一輪紅日傍窻低
溪樹迷煙百鳥啼
飛絮作團看貼水
落花成陣欲沾泥
誰家筆底凌雲賦
若箇懷中取月梯

我是釣徒宜泛宅
獨尋江畔草萋萋

花前招朱耕方懷鏡渟姚翼扶家玉田小飲

我生垂老雪盈頰
愁對名花歷亂開
儉腹詩成羞筆墨
寒齋酒罄愧尊罍
惟吟舊句酬紅藥
且脫青衫換綠醅
不是衰翁偏好事
一年佳景幾多回

寄表姪周策銘編修

撫心自問杳難憑
到老豈無一事能
對月何妨千日醉
望春不憚九山登
忘憂偶爾同先聖
教子還須擬大鵬
却歎紅塵紫陌裏
向隅時有淚痕凝

時表姪有喪
明之痛故云

病愈口占

一旬兩粥轉狂歌
聲徹遙空氣益和
自問不知身有疾

旁人訝道酒爲魔未須飲食心先泰重步庭除興較多
寄語往來諸君子高岡已過入平坡

飲友人齋復承看菊之訂

日月無端笑蟻旋草堂不惜醉瓊筵藥爐茶竈交初夏
酒盞花枝入暮煙桂蠹樹空知舊蛀籜龍苞脫放新鞭
何期重訂深秋約傾倒東籬黃菊邊

己亥歲春遊懷茹英八弟和叔十弟

春遊豈讓冶遊郎竟日相逢合斷腸舞態低徊看蝶媚
歌聲繚繞聽蜂狂淡妝濃抹峰千朶淺笑輕顰花一墻
寄語惠連池畔好茸茸芳草發幽香

一字詩示戴壻晴江

一村煙火路橫斜寂寂江天一望賒萬點晴沙一片雪
一川高樹萬枝花豈無一得惟三樂祇擬三愆僅一差
一度嗟呀一度老不堪一一數啼鴉

三昧庵訪桐雲上人

旣無術業堪求富那有文章可送窮一自鶯聲啼北苑
漫教花片舞東風晴絲直接峰巒上春色遙連梵院中
慚愧十年蓮社約轉憐落拓類飛蓬

答贈陳含美

放浪形骸一散人每從詩酒見天真閒吟待月柴門迥
小飲看花石磴新性似神羊能觸佞才如俊馬不驚塵
莫愁身外無餘物獨有乾坤未是貧

憶得登澄江浮圖遠眺
偶上浮圖望海天江潮浩蕩鎖雲煙金焦空打千年浪
洲激常沉萬頃田黃歇墓邊思毅魄杜康橋畔想流涎
獨憐萸爾沮洳地鴻雁哀鳴倍慘然

憶得句曲旅館夜吟

風搖樹影冷於僧蟬唱新秋抱瘦藤一世良朋惟紙筆
半生知己只書燈閒房不寐茶頻熟別院無人草自增
六代繁華何處在明朝馬上說金陵

憶得丹陽縣城霞閣拜關夫子

義勇摩空保漢邊至今傑閣插雲煙當年浩氣籠吳魏
他日丹誠補地天弟道由之無忝矣臣心於此益昭然

三分不忿還惆悵獨對江流把恨傳

憶得雨花臺酒樓卽事

尋芳漫上雨花臺更向旗亭貰酒杯淡淡江山雲外見
喧喧鐘鼓樹中來紅牙按拍興亡感碧草埋香今古哀
弗慮周郎能顧曲繁絃急管任徘徊

悼亡室吳孺人

湘簾半捲燕初歸坐對名花暫息機客去但憑童洗硯
鶯啼不覺淚沾衣堂虛空抱人琴恨草滿徒憐蜂蝶飛
覓得青田成獨醉醉吟殘照到柴扉

午日

朱旛遙映畫橋西鼉鼓聲聲高復低蕭艾煙深遮古道

空明子詩集卷之六
三
菖蒲花發隔前溪綠窗一曲人皆醉紅粉千行眼欲迷
誰是幽栖偏獨醒竹籬茅舍聽鳴雞
葵榴裝點作良辰傀儡驚看競雜陳三楚已留千古恨
五絲難續一孤身吟邊爛醉人如玉天外新懸月似銀
蕭史不來彩鳳去暮山靄靄欲沾巾

過石湖橋

畫船歸去獨宵征曉夢初回風雨驚夾岸垂楊聲欲折
斷虹流水勢如傾蜻蜓立草還高下鷗鷺隨波似送迎
記得舊時搖櫓處淡雲籠日暮山橫

夜窻

玉鏡臺前媿老奴如今贏得夜窻孤談心祇有書千卷

散悶全憑酒一壺寒兔照空穿鴨脚嫩螢侵案撲蝦鬚
些些底事休重憶燭影搖紅到綠蕪

亡友謝依成令子頗稱力學書此志喜兼以勉之
太傅風流古所傳傳家惟有硯爲田只看玉樹悲前哲
漫對芝蘭喜後賢展卷一燈明爍火助吟七椀挹清泉
熊丸不負萱堂望勵志芸窻好着鞭

贈道友

食柏餐松第一流吟壇直許壓錢劉神通跳脫三千界
踪跡流連十二樓鶴唳徹天和月皎鸞聲應谷被風留
相期世外談真訣散髮佯狂任拍浮

憶亡友趙虎文

東風習習泛輕舸山外遙看點碧桃鬼火燒春偏帶雨
布帆挂雪忽驚濤是非反覆悲千古鬢髮星霜感二毛
一自羲皇人不見至今惆悵白雲高

憶亡友沈瑤田

不因頭白減風流飄泊吳淞二十秋詞賦驚人推李杜
英雄敵手數曹劉杯空燈暗鬢常撚裘敝寒深客浪遊
豈料歸與成大別衰楊宿草已荒丘

挽錢介維

富春垂釣懶稱臣天地中間老此身詩酒百年終不厭
鶯花三月獨相親未雕璞玉酬知己空貯贏金付後人
慚愧勢交誰念舊白楊已捲隔年塵

丁酉已葬於先相國錢龍錫之次昭

憶同亡友岑遙青觀劇

偶乘清興過橋東列子偕行好御風暫借管絃消塊壘
不隨優孟識窮通立殘芳草春泥碧望斷橫雲山夕照
紅回首十年成一慟飄零無限落花中

憶得赴亡友查掄一歌筵

忽聞蘭麝散幽香誰喚仙姝到洞房玉蝶浪交羞粉褪
金鶯巧轉引聲長高燒絳蠟看花影淺酌紅螺入醉鄉
今日相思如隔世畫闌干畔綠陰涼

憶得赴先姊丈陳麟書雅席

主人開徑特張筵正是三春柳浪天座有酒糾能不醉
花當月照益生妍紅殘一樹纖纖雨綠散千枝裊裊煙

幾度欲歸歸未得却思早泛五湖船
憶得同亡弟齊軾芝秀堂宴集

風雨雞鳴憶草堂曾同花下把吟觴嘉賓漫許雲間陸
列宿虛疑天上張新暑乍添臨雪檻清歌初轉繞虹梁
莫教月挂城頭早相送溫柔到醉鄉

戲贈

共道秦綢奚足怒即稱晉侮不須哀托金豈讓衣冠侶
擦箠爭誇鷹犬才鞭撻未逢蕭穎士文章差勝郗方回
懶鬚瘦面尋常責莫學髯奴似死灰

美人鞋

幾度凌波向碧空更於晴日踏春風一鈎纔上蛾眉月

半折新開犀角弓點板慣從歌扇底勾情時在燭花中
南唐金縷無消息立斷香堦怨落紅

美人手

曾見柔荑玉筍新幾回花底摘殘春穿針鬪巧喧喧笑
握管懷人默默顰隨意按歌閒點拍經時把盞不沾唇
只宜對鏡調脂粉莫向東風灑淚頻

美人眉

自從京兆寫來真便覺修蛾別有神柳葉拖青堪挹采
黛螺凝綠不沾塵遠山淡淡侵濃鬢新月彎彎照淺顰
莫使閒愁頻鎖着無端蹙損兩莖春

舟行新鎮

暖風吹日捲晴波柳線回芽着意搓兩岸煙輕紅霧少
一江潮長綠痕多村荒敗瓦封苔蘚寺老危墻鎖薜蘿
此地不來經五載小橋依舊滿青莎

過鶴沙

一條晴雪凍寒溪寂寂芳塘路不迷野鶴何年海外去
荒雞此際午前啼淡雲欲鎖千村合麗日高烘萬樹齊
聞道沙中多石筍幾時纔得出汙泥

曉晴示吳周翰內姪

凍雲開處見晴陽一曲清溪野菜香茅屋僅如蝸殼小
板橋竟似馬頭昂行春不耐鴉千點覓句還憑酒百觴
誰識此中真得意悠然世外絕炎涼

浦口候潮爲上元學博蔡麗明

名錫蕃

大甥賦

密雲濃深鏢朝陽風打銀濤百里長萬丈冷煙迷野渡
千株古木傲寒塘隔江寺遠沉金碧虛室先生現吉祥
莫向候潮三老囑片時飛渡若康莊

望遠憶焦廣期孝廉

獨棹扁舟過野塘倚闌凝睇望高岡枯藤未許回春色
老榦偏容照日光一臥自憐多別趣六根頗覺有餘香
陸通不敢尋常遇恐被無端笑鳳凰

賦得清江使者

翠毫覆體蜀江清元緒東來顯姓名豈爲楮牀偏不死
却緣升木竟長生浮蓮可有千年算藏笥終難一卦成

莫漫能言誇四翼守著何處覓靈莖

天駟篇 為崇川沈浴沂巖逼真倪藩玉峰
唐奕琦錫山楊潮觀諸小友賦

周王龍駿技通神漢帝麟駒號更真伯樂顧時聲價重
子山謝後品題新碧霞耀彩看噴玉朱鬣騰空見絕塵
休怪編錢成馬癖桃花紫燕各爭春

雞

身兼五德煥文章蜀產珍珠孝更彰不藉曉籌傳絳憤
漫勞童子化陳倉談玄空自來窻畔刻木何須問道旁
獨有北山山下客祝音雞無事臥尸鄉

示錫山華生履仁

髫齡鼓楫遠相從几杖親承示正宗材訝豫章成七日

聲礪瓦釜變洪鐘尚須細細心如髮更要蒸蒸氣似龍
一片宮商欣有屬松窻莫負日高春

與膠城顧生小飲且寧軒下

桂香雲澹雨餘天畫檻流連到酒邊碧水半灣環砌下
紫薇一樹拂窻前投來冰柱章章好轉去鶯聲語語圓
對景正須澆塊壘隔池綠竹鎖晴煙

懷王虛亭廣文名鑄

亂鴉衝破幾重雲盡日思君不見君絕巘豈容千點合
長江偏有萬條分獄中若箇憐冲斗爨底誰家識斷紋
從古竒材多濩落莫須下第哭劉蕡

生涯寄雪舫趙甥

自分生涯茶一盃近來愚上更添愚寒欺老鬢頭如雪
病減新詩句若珠懶散學成求半是棋枰着定肯全輸
誰人逗我機關轉待兔無勞更守株

遇義興儲定伯問其尊人六雅孝廉

驚風乍過雨濛濛一片松筠鎖碧叢萍梗未容催白髮
煙雲豈必落丹楓橋當斷處逢船渡山到窮時得逕通
偶遇芝蘭問消息秋江澄澈點飛鴻

寶劍篇贈崇川吳雨洲沈旣閑施元綸三生

干將鑄就出新硯不比魚腸別有靈殺鬼定教千日暗
斬蛟能使一江腥倚天衝斗光凝雪斂鍔藏鋒色帶青
豈止擅長誇割玉會看躍水化龍形

空明子詩集卷之七

壽春兄鐵岡先生選

華亭張 榮景桓著

姑蘇謁夫子廟

舊傳學宮係范文正公捐建

風清日暖好春光瞻仰親登夫子堂禮樂百年看漸盛
詩書千載見彌芳泮池直接三條路濼井遙連萬仞墻
父老還思丞相澤幾經憑弔已滄桑

今范氏子孫衰替已甚故云

雨窻示介山姪

竹葉頻斟細雨朝湘簾不捲獸煙飄韶光隱隱催鶯舌
春色欣欣上柳條遊興新來緣病減詩懷老去爲愁消
食茅踐土慚無報空有文章答 聖朝

對酒寄伊章姪

隔岸蕭蕭竹萬竿夕陽西下雁聲殘剪燈伴我琴書冷
說鬼驚人毛骨寒室淺雪深衣絮薄窗虛風勁客心酸
耐交惟有杯中物貴賤窮通一例看

同李節珊踏青作

幸有同心早訂交踏青策杖到春郊鄙人蹇蹇求三益
君子謙謙愧六爻席地望雲看落照攀條待月探危巢
游行自許清狂甚不學楊雄作解嘲

戲贈庭樹白頭翁

鳥名

捲簾與爾細綢繆簾內簾前兩白頭君在枝間方溜語
我來花底漫凝眸金衣公子招爲伴錦瑟佳人許共遊
最愛曉晴春色好綠煙紅雨不知秋

聞除崇川司訓之命有作

甲煎新試嫩煙凝宿酒騰騰苦未勝忽報及瓜來下里
却同徹體臥層冰衰容凋謝如田父瘦骨支離似病僧
兒女不知心裏事夜深猶自話殘燈

哭二兒秦蘭作

百年三萬六千回浪度生涯愧不才花謝綠苔猶未掃
鳥銜紅萼莫相猜闢開世路燒塵網叅透源頭認劫灰
何事愛根難割斷秦蘭

飛熊乳名

解語在嬰孩

贈上洋王印川時當上巳

長吟酬爾好風光囑爾風光莫太忙一半暗消綠夜雨
三旬還喜刺春陽燕鶯軟語紅猶嫩蜂蝶交飛綠漸狂

欲覓新詩題四壁懸知彩筆屬江郎

巳亥春連喪幼男幼女誕辰志痛

可憐六十一回春倏過春光又六旬
幼女幼兒新入夢
亡妻亡妾已成塵還憑道韞吟詩穩
且喜寧馨問字頻
老眼豈堪多下淚破除煩惱證無因

奉謝大中丞吳公

執經親侍絳幃旁何幸躬逢麗日長
總覺陶鈞回造化
濫叨栽植出尋常擬裁政績詩千字
愧乏人情紙半張
空戴儒冠難報稱恩同覆載詎能量

上藩憲楊公

筦鑰軍儲控大都公私緩急賴訂謨
旬宣南國稱雄鎮
屏翰神京作壯圖著就凌雲高百代
沛來霖雨遍三吳
望光實履登龍願願侍關西拜哲模

上姑蘇郡侯梁公

紗籠門第佩金魚補袞家傳吐緒餘
德茂定教蝗赴海
政成還見雨隨車韋公恬澹真難及
白傅風流較不如
異日 聖明應念舊沙堤共仰曳華裾

上姑蘇家司馬梅崖

叨附華宗幾十秋愧無術業謁君侯
豈期崇海膺師席
特向吳門作宦遊政事共傳同應物
文章今果並蘇州
自憐才拙輸平子惟待吹噓到白頭

渡海望狼山一帶

無端捧檄到江城夾岸閒看鷗鷺盟家食半生餘寂寞
皇程千里有逢迎片帆飛渡真如鏡一葉輕飄竟似萍
極目狼山何處是淡煙濃樹隔崇明

初到崇川有感而作寄陳含美懷鏡淳兩君

半生樂道轉陶然何事相將泛海天入境但逢三日雨
望鄉已隔一重煙崇川豈是逃名地微祿爭如負郭田
官舍草荒留不得好爲歸計待明年

蒙副總戎冉公郊迎致謝

喧喧車馬到江干盡訝將軍禮數寬儒術於今誰見重
交情至此我何安無慚世德惟三畏有玷微名只一官
喬木絲蘿真得所不將末吏等閒看

鈕星濤先生留寓作此志感

謫仙家住古瀛洲引我疑登百尺樓氣誼萬間誰及得
文章千載孰能侔壺觴花月無虛夕嘯傲煙波有別愁
慚愧一身飄泊甚幾回欲去爲君留

與齊樗叟學長閒敘

廿年頭白轉蕭條此日相逢歎寂寥官舍不堪容塊壘
泮池已見長蘭苕窺梁只有穿簾燕夾路惟餘跨澗橋
我有伯通留廡下君今何處覓簞瓢

客居有懷寄於覲宸壻暨汪錦江外姪孫壻

家住東吳蘭若邊幽居不復記流年燕來燕去山中曆
花落花開世外禪一水有情環屋後數峰隨意點門前

故園猶憶談文日高枕南榮任醉眠

答和俞楠亭原韻

茲遊竒絕冠平生萬壑朝宗無限情龍沫遠粘三島暗
蛟涎遙浸十洲清且看逆浪峰巒色共聽驚濤澎湃聲
一片征帆吹不住滿船風雨費經營

茲遊竒絕冠平生海水連江怡我情浴日映天同大赤
浸雲和雨失深清南瞻吳會煙霞色北接揚州雞犬聲
巨艦高檣沙岸泊候潮商賈似蠅營

茲遊竒絕冠平生日暮煙波別有情江水汪洋方泛碧
海潮衝激漫撓清沙邊共喜千鷗浴雲外遙傳一鶴聲
身世是空還是幻破除煩惱淡無營

茲遊竒絕冠平生豈有枯禪動宦情浮海未能關痛癢
渡江不是爲澄清蛟龍起舞凌波立魚鼈高跳觸浪聲
學道廿年方得力任他三老自營營

答和馮方山原韻

兩岸青蒲映旆旌一江江水蕩空明署中原許移家住
海外何堪挈子行方丈有山尋漢武芙蓉無主問芳卿
故園親友如相憶臥月眠雲獨稱情

答和潘層峰原韻

師臣行矣愧儒宗不是雲間陸士龍殘月半彎臨薤葉
遠山一抹蹙眉峰可憐杯酒供人恨贏得江濤滌我胸
此去好爲仙島吏莫因頭白笑龍鍾

答和柳菱村原韻

素心久與鷺鷗盟五柳高風對落英半幅龍蛇蟠蠶紙
滿盤珠玉壯吾行挑燈夜夜思彈劍脫帽朝朝願濯纓
一笑欲歸歸便得恐勞猿鶴遠相迎

答和家阮建安原韻

江干話別集羣賢幾片紅旌送上船綠柳帶煙籠斷岸
青蒲映水接遙天已知小阮爭相重更許鴻文必共傳
今日宦遊非遠道森茫仍有白雲連

答和于南田原韻

誰謂師儒是冷官但知有煖不知寒時方六月炎威盛
地近三山海面寬君子法天先法健聖門觀水必觀瀾

此行不負乘槎願赤日當空浴玉盤

答和夏全璜原韻

一溪花雨瀉紅泉半枕松風天籟傳荒徑不芟書帶草
餘香常裊獸爐煙新鶯獨嘯高枝上嬾蝶雙棲小砌邊
折柳長亭應悵絕暮年衰鬢困寒氈

吏人催促遠相迎鼉鼓三聲幾片旌斷岸半程違故土
征帆一挂隔葦城及瓜只算聊觀海投筆安能更請纓
此去便爲歸隱計名高厚實兩無成

答和姚殿颺原韻

浪捲浮沙海氣黃催人無那理行裝欲貽堂構千秋業
常仰高曾百世芳當代賴君巖下電故交知我水間牆

聯牀道義憑誰講目斷天南君子鄉

答和黃彤文原韻

一官無那促皇程未及張筵敘別情魂斷片帆浮大海心驚落日照孤城漫勞裘屐乘肥至又見干旄出郭迎回首問心真不愧如何不負到東瀛

答和鍾豫凡原韻

五色佳章爛日華一簾晴影散窻紗爨桐直待經焦尾彩筆懸知早夢花憐我舊曾思吸露對君重與話餐霞此行且向崇川去淡水交情有幾家

答和凌采南原韻

躬逢海晏及河清沼芷汀蘭夾岸迎三盞酒濃留客住

一帆風飽送吾行坐看茅舍淒涼景臥聽漁歌欸乃聲
回望南沙何處是斷雲遙接五茸城

答和陳含美原韻

東瀛四面繞孤城垂白何堪壯此行不酌貪泉非爲利
獨居陋巷敢爭名豈期飛絮因風隨竟似浮萍逐浪生
惟有故交應識我夜深無寐到黎明

總戎尚公賜顧兼餉華筵賦謝

王家世裔舊登壇坐鎮崇川萬姓歡豈有儒生勞八座
共瞻上將屬三韓一尊傾出真瓊液百味盛來盡玉盤
何意白頭憔悴叟却蒙青眼另相看

大叅魏公華簡下頒作此致謝

揚鑣分路鎮崇川問俗觀風屬大賢晉謁未行趨拜禮
斗山已報紫泥傳豈容末學窺全豹祇有微忱戴二天
今日泮宮零落甚輝煌金碧在何年

與朱燮庵縣尹

華亭舊隱老諸生偶到瀛洲著姓名問禁喜開三面網
矢公不愧一廉聲絃歌比戶知風美雞犬無驚想化成
異日逍遙扶杖至琴堂能許似冰清

課士日作

焚香翫茗絕塵埃桃李門墻著意栽笑我白頭真箇拙
對人青眼幾多開執經函丈名流集問字玄亭髦士來
澹蕩薰風吹絳帳可憐剛道是粗才

渡海作寄姪壻宋文禎

北溟何處覓鯤鵬渡海真同雲水僧簸浪橫飛千片玉
矗天高立萬層冰波濤自許憑忠信順逆焉知有愛憎
識破世間都是幻扁舟一葉任崩騰

己亥季夏假演武場課崇庠諸生騎射

數聲鼓角壯干城飛蓋遙臨細柳營一片平沙明遠寨
幾羣班馬動長鳴彎弓盡訝漁陽將把袂爭誇魯國生
我本師臣偏好武問渠諸弟許聯盟

總戎尚公招飲又蒙送出大門書此寄謝

玉帳牙旗鎮海疆伏波韜略遠名揚雅歌孰弗欽華胄
珍饈爭傳出尚方漫許小儒叨上坐得親細柳見尊

光平生知己真難遇一識荊州自不忘

大叅魏公崇川試士喜而賦此以志一時之盛

相國家聲識治才京江移鎮海邦來宣揚 聖德推行
部燦爛文星接上台幾許笙簧吹五典滿城桃李蔭三
槐宮墻何幸沾時雨看取名花歷亂開

崇明縣向屬蘇州府太倉州治下有感而作

荒齋風月久相親城市山林任老身一自馳驅違故我
幾回嘖笑失天真雙州壓頂難爲下獨縣當頭愁絕人
蔬水曲肱雖足樂可憐衣帶污輕塵

送總戎尚公之任象山

幾回不責吐車茵恕我顛狂爛熳真方喜栽培沾化雨

豈期遷轉失陽春 朝廷定要徵侯霸崇邑終難挽寇

恂指日 聖明深眷顧分茅重見鳳毛新

寄奕山弟

短亭纔過又長亭魂斷天涯幾醉醒耐冷喬松添翠色
趁風鷺鳥展霜翎近山平疊真無味遠水蒼茫若有靈
羨殺惠連家食好此心久戀釣魚汀

答和宋王谷原韻

無拘無束老頑仙榮辱窮通聽自然墨浪潑開長作夜
地球翻轉倒看天罡風厲處飛黃鶴烈燄中間產碧蓮
只有唾餘千萬字道人笑謝不須傳

客窻有感寄姚子文外史

頽垣老屋鎖寒煙
檢點閒窗手一編
酒量僅容三合水
詩懷直透九重天
觸蠻每笑蝸爭角
紙陌尤憎鬼愛錢
早晚歸聯湖上約
滿帆風雪臥漁船

征雁篇懷姪壻吳勤庵刺史

諱文炎

蘆花如雪滿寒溪
天半征禽聲慘悽
旅館心驚殘月落
客途魂斷夕陽低
陣圖共演成三變
隸篆連書賦一題
莫爲離羣增感慨
搗衣有曲寄關西

婁東州太守李公賜顧有作

素絲良馬競傳呼
在浚干旄感大夫
太守昔曾推召杜
儒官今已遜胥徒
各天惠露碑於口
隔海仁風扇及吾
若見中丞煩問訊
爲言明月照冰壺

答和宋又韓原韻

簷前鳥語雜書聲
敢有文章敵兩京
看竹喜逢甘國老
焚香時對楮先生
花梢拂水侵冰鏡
日影穿窗照石泓
我道祇宜常寂寞
豈堪一笑惑陽城

家住東吳東復東
布帆斜挂得相通
心驚零落三間殿
目斷荒涼一畝宮
幸有同人霏玉屑
可憐雙鬢怨啼紅
故園兒女殊堪憶
雲暗天南夕照中

答和施松友原韻

花影參差山外懸
數枝高樹忽驚蟬
豈容草野當師席
自愧粗疎對法筵
老景垂頭真潦倒
少時不學失陶甄
惟餘兩眼明於鏡
來看瀛洲橫海鱣

空明子詩集卷之七
十一
答和聞德沾原韻

捧檄東瀛蒞泮宮崇人誰不笑愚公濯枝未有廉纖雨
忤俗真同牛馬風豈與塵中爭勝負那堪海外別雌雄
蒙君話我寧馨好夜夜相思夢兆熊小兒名兆熊

答和施卓人廣文原韻

雲移畫障花枝滿月照湘簾燕子雙堆徑綠蕉酣湛露
傍崖紅蓼戰澄江蒼松老榦遮高閣嫩火新螢拂矮窗
獨坐夜涼眠未穩一燈相對影幢幢

從無詩句追元白豈有文章並柳韓一飯未酌真可愧
片羶坐老不知寒何人贈我連城璧若箇投來空谷蘭
朝晚歸與耕且讀願言結契脫儒冠

答和楊舜年原韻

可憐頭白不知羞垂老還來海外遊幾度愛風虛北牖
何時長嘯坐南樓碧桐露滴三更月銀漢光浮五夜秋
東望蓬萊將萬里跨龍騎鶴有誰侔

呈總戎陳公署崇鎮事

世篤忠貞話故侯鳳毛重振此風流羣知緩帶窺中秘
共仰輕車鎮上游十郡屏藩資勝算三江鎖鑰賴嘉謀
儒臣得侍觀韜略仗劍從軍到白頭

蒙大叅魏公格外相待書此志感

布衣蔬食任天真司訓崇川白髮新迎送豈期勞節使
笑談何意慰儒臣治民督餉無雙目重道尊師第一人

俯仰高深無以報願將明訓敬書紳

答和劉君一原韻

愧乏詞華敵兩京流芳那得播滄瀛豈能新語成佳話
不過常談屬老生羨彼至人偏有欲輸他上士竟無爭
蒙君贈我琳瑯句一片雲霞護赤城

答和倪浩山原韻

一肩行李出雲間安定風流那可攀澤國煙霞縈客抱
海天波浪對愁顏金鼇亘地孤城壯紫蜃騰空落照殷
聞道洞賓仙跡在幾回凝睇望蛇山

答和宋又韓崇庠閱諸生騎射原韻

日麗風晴聽鼓鼙柳營沙細馬頻嘶十年隱霧成文豹

一騎騰空捲赤霓衣帶香飄書卷動鐃歌聲壯陣雲低
祇期六藝傳東魯不羨凌煙姓字題

祝吳大中丞華誕

清朝柱石建高牙龍節蜺旌開府家屏翰三吳濡雨露
東南半壁爛雲霞共知愛養真無限羣仰恩波未有涯
大德正宜登上壽願同松柏度年華

總戎陳公賜顧有作

四鎮崇川樂化成自來閩外重專城伏波強弩今重見
橫海樓船舊有名儒將賁臨欽宿望書生親炙仰文明
胸中武庫知無限一拜恩光心膽傾

海濱遠望同吳幔亭內姪

臨流擬築狎鷗亭極目遙山幾點青蛟蜃吐涎粘碧漢
魚龍鼓鬣立滄溟三沙洲一片如碁局二嘴海口南高
角雙螯若蟹形可惜江花搖落盡不堪詞賦歎頽齡

舟中高臥竟日有作寄季克紹

高臥陳搏八百年豈期重見此張仙一官倨傲尊寒暑
萬種荒唐熱冷羶轉眼青春過六十掉頭白髮滿三千
登舟便入莊生夢不覺昏昏竟日眠

奉謝大中丞吳公

吐茵恕我不生嗔侍坐崇朝笑語真一片狂言彈墨吏
廿年清操表儒臣官茶屢賜憐寒士絳帳頻開念老身
折劍漫勞動拂拭豈能重躍化龍津

奉謝郡侯梁公

朱幡畫戟兩翩翩五馬風流仰大賢幾度燕居親笑語
一時高誼戴雲天孟舒有德真堪慕崔協無文徒自憐
老驥敢云羞伏櫪長鳴豈望錦爲韉

贈梅崖家司馬

分憂贊治建嘉猷相佐名藩意氣投香徑有無叨妓引
劍池曾否被僧留二句用樂天公堂羅雀清如水案牘
刺蘇州時作堆山判若流爲問江州白司馬幾時遷轉到蘇州

郡侯招飲不赴賦謝

海外驚傳一葉秋因思解組此間遊非關乞食來吳市
不爲尋芳到虎丘宿疾未除愁病酒新涼乍試怯登樓

連朝已醉醇醪飲何必張筵更拍浮

上署藩憲上江十郡道臺王公

上國羣推善理財東南借箸賴栽培公私饒足人情悅
賦斂寬平帝眷來李絳簡廉多令譽崔從風望擅通
才捐征去蠹誰能及竚見恩波遍草萊

和陸生登蓮華峰原韻

攀援苦憶十霜前俯瞰湖光直接天呼吸片時通冥漠
虛無盡日淡雲煙亂峰竟似仙人掌萬籟遙同錦瑟絃
惆悵全吳風景在霸圖遺恨越來年

和陸生讀虎丘志二首原韻寄沈耀遠學博

雕闌畫檻接高樓樹裏黃鸝聲欲流短薄亭臺新點綴

長洲煙草舊翱翔游劍池有塚波間冷天雨無花象外收
寂寞繁華何處是一輪殘日到林丘

白公堤上竟何之爲訪僧房洗硯池西澗飛泉懸玉螭
東風吹雪滿辛夷石邊有誌猶能辨亭內無人竟問誰
還憶夜深殘月落鐵花崑畔數聲詩

上總戎陳公

願辭師席作門生親侍元戎君子營樽俎片言霏玉屑
瓊瑤滿案發晶英虎頭定是封侯相猿臂羣來善射名
若使孫吳生此日馬前只合擁蜺旌

答和沈魯玉原韻

高坐閒房正鼓盆吏人相促出衡門乾坤有恨何須說

空明子詩集卷之七
桃李成蹊自不言怕聽雨聲翻碧瓦喜看月影照華軒
陰晴振古無常定造化真堪細講論

沿溪嘒嘒聽蟬聲黃土墻邊見紫荊不道漁樵皆識姓

豈期草木亦知名江淮草木亦知爾名張萬福事投來麗句誰能敵讀

罷瑤章孰與京風俗自淳深嚮往景行敢曰表幽貞

答和施卓人原韻

謫隨空愁碧落間浮槎東海見遙山經旬望古師黃老
竟日臨深法孔顏竭力打開名利網潛心看徹死生關
蒙君譽我非徒語已證仙儒第一班

本來碌碌一書生豈曰能空又復明聊與塵緣除孽債
敢云天爵竊虛名百篇短什酬吟咏一盞清茶當送迎

身世漂零君莫笑廿年頭白老無成

步施卓人賦空明二字原韻

誰能空處識真空空到真空竟不同豈覺山高并海濶
那知鬼斧及神工中邊不着如晴影上下虛懸類混濛
識破至空成獨樂任他人世自朦朧

祥光虛室靜生明銀漢高橫跨玉京五色畢呈冰鏡澈
雙丸難避練江清海山照曜搖珠樹星斗輝煌動劍精
萬古不磨同白晝西方何必問長庚

拜陸瑞文之節母宋氏有作

閨中高行久流芳仰止景行道里長水遠紆迴環小圃
竹深青翠護閒房孤飛不見營巢燕雙跪堪憐覓乳羊

莫怪詞華推獨絕機雲門第擅文章

獎沈門節婦施氏伊子範成作詩致謝依韻答之
崇川司訓白頭年慚愧君推間世賢共仰冰霜高閨內
更欣蘭玉滿庭前破巢重見還成壘鍊石今看竟補天
拜罷稱觴祝壽母分甘娛目自翩躚

獎處女守節樊門張氏之作

松筠亮節著崇川操比共姜世共傳處女偏能爲烈婦
撫孤真不愧移天丸熊課誦三更鼓截髮留賓一爨煙
囑爾後昆須養志願言稼圃嗣前賢

鄆城尹於子來姻家因病歸里爲賦燕剪以贈之
一雙玉剪下遙天盡日呢喃畫棟前界破紅衣春寂寂

裁成金縷恨綿綿頡頏花落千枝月下上波開萬頃煙
莫漫穿簾營故壘尚方補袞待周旋

上鎮臺陳公陞任崇明

忽傳特簡鎮東瀛喜覩元戎致太平向慕一身都是
膽今看萬里盡知名臣心似水推無敵聖德如天仰
至明竚見分茅頭正黑幕中須辟老書生

恭祭大成至聖先師作

絳燭輝煌殿宇深冠裳香滿月痕侵牲陳剛鬣柔毛體
樂奏黃鐘大呂音鼉鼓數聲昭至敬犧尊三獻表微忱
儒生何以酬宣聖不改從來願學心

答和郭景文原韻

名心消盡道心存月照梧桐出海門纔見堂前飛燕子
忽驚簾外長蘭孫無功豈敢叨微祿不飲何知有上尊
承譽橫渠留一綫西銘誰與細談論

答和倪文九原韻

不學儒官泛海槎敢希左氏競浮誇春秋默運乾坤炁
朝晚狂吞日月華簾捲湘波來燕子夢回蕉鹿落松花
射雕喜遇無雙手好看晴天萬里沙

答和施又唐孝廉原韻

陽春寡和曲彌高深愧詩豪並酒豪盡日看花酬故我
經旬掩戶謝同曹投來珠玉逾華袞恨乏瓊瑤報木桃
小視太山君莫笑且同蒙叟大秋毫

答和鎮臺陳公原韻

鴻鵠高騫萬里秋琳瑯下賜曜明眸蜺旌掩映芙蓉岸
龍節飄颺蘆荻洲潦倒儒官承顧盼寂寥寒暑愧清幽
幘幪庶類誰能似羊祜羣知第一流
氣肅涼生碧樹秋欣看紫詔獨凝眸琯戈舊賜傳三
殿玉帳新開照十洲刀劍慣諳圖陣古冠裳深染墨香
幽蹄涔一寸殊堪愧河海偏能納細流

文章事業足千秋喜見君侯豁兩眸節鉞勲名高柱石
詞華聲價壓瀛洲腐儒空有談詩僻開府真能選句幽
鼓吹太平成盛世海疆從此自安流

天高雲淨潔於秋威鳳遙臨注我眸幾許和風吹巷陌

一時化雨遍滄洲平原小試千人擁傑閣長吟萬象幽
才愧浣花蒙過獎西川節度獨風流

如天雅量氣橫秋千頃汪汪照我眸多士望風環泮水
下民待治滿汀洲宣猷布化情偏切醉月吟花事更幽
細過必矜成大德可知萬里障狂流

七月二十一日渡海有狂僧同舟漫賦

濛濛細雨自西來獨坐危檣首重回舊事關心何日解
新愁鎖恨幾時開狂風絕類癡和尚逆浪真同鈍秀才
到岸午雞曾唱未吏人驚報是方纔

鎮臺陳公屢有請爲門生之謔作此應之

曾從麾下話綢繆又見高軒枉道周豈有寰中管樂侶

反師方外老莊流雄才真足操長算淺學何能與密謀
幾度詼諧成絕倒自憐秉鐸已含羞

上觀察李公

赤幢曲蓋際清時聖德宣揚道路碑共仰大賢司淑問
曾偕小阮侍 彤墀糾繩吏治人爭服平反民冤自不
欺願接檐帷窺管豹仁風惠露總無私

渡海懷靖江學博沈方陶 諱世求

巨鼇鼓浪濕衣襟萬里煙波思不禁隔岸未知何處是

回頭已被密雲侵舟行水底深三丈 浪高於船約三丈 風落檣

旁濶十尋 布帆約濶八丈 望眼欲穿離苦海那堪還憶老龍吟

崇川望海寄南映大姪

波迎朝旭沸黃金攻岸鼉鼉日見侵填海空銜精衛木
鞭山枉費祖龍心望中徐福傳瑤島城外天妃傍碧潯
擬脫儒冠尋小阮一瓢高挂臥江陰

和介山二姪賦燕知社日辭巢去原韻

故巢收拾破還成幾度穿花舞態輕曾向月華憐永夜
忽驚霜冷動長征珠簾寂寂無勞捲藻井沉沉那復營
宴罷雞豚休悵別明年依舊作新聲

和昊霑四姪賦燕知社日辭巢去原韻

卜稼欣看萬里晴舊巢辭燕倍多情穿簾兩兩愁魂斷
剪水雙雙悵目成塞雁拂雲河漢冷霜鷹度海露華清
此時送爾高飛去一抹遙山翠黛橫

空明子詩集卷之八

壽春兄鐵岡先生選

華亭張 榮景桓著

謁天妃

香煙高結鎖瑤宮赫赫神旗捲颶風浪接遙天豈有限
雲歸大壑若能通壺投玉女誰爲笑珮解江妃盡屬空
惠遍九垓人共仰著靈不獨海潮東

龍王廟

聞道龍王鎮渡頭桑田滄海歷千秋鯨鱗直撼長天動
鼇背橫撐大地浮樓市不勞驚曉夢鮫綃空自織春愁
珊瑚鐵網憑誰覓紫貝明璫莫浪投

題聽花書屋

淡黃嫩紫各呈材
檢點聽花坐碧苔
細細滾塵紅雨畔
惺惺解語綠雲隈
有時着露垂頭泣
竟日迎風帶笑開
莫訝洗妝成寂寞
金錢早卜合歡來
羣芳逞豔鬪新晴
靜掩閒房聽有聲
花板點風吟宛轉
鶯簧弄舌和分明
爭春欲訴消長晝
索笑無緣泣五更
最是夜來眠未穩
一庭香雨散瓊瑛

姪壻王德公

名圖新

華亭相公第四子也青年力

學不矜門第接其都門來
札情意良殷予因踈懶遲遲未答偶然念及特賦一章用酬雅愛

六十年來塵外客
五千言裏箇中人
打開利慾傷生網
贏得衰殘未死身
憐我夢槐驚片刻
羨君吐玉已經旬

烏衣門第江東著
池上聯看鳳羽新

蒙觀察李公待以異數作此志謝

絳帷親侍接光儀
嶽降生申凜四知察
吏至公唐見素澤
民偏切宋敦願
各沾雨露於人遍
頓覺栽培獨我私
高厚難忘天地德
欲酬無策只吟詩

賀錢塘王似齋復任崇川

青箱世業著三槐
共仰王喬烏更回
崇海憶君如望歲
巖疆待治亟需才
民歌賈父來何晚
士幸河陽花再開
竹馬歡迎誇僅見
丹書又恐出蓬萊

家司馬梅崖招赴華宴作此致謝

白傅偏思旅食人
華堂開宴召儒臣
肴兼山海珍羞備

樂奏笙歌法部新風動乍疑迴白雪霞飛轉盼落紅塵
自憐皓首窮經客也被陽和有脚春

讀郡侯梁公大集有作

捧讀瓊瑤益自羞十年恨不早從遊館開東閣由來貴
坐向春風分外幽下士未堪親絳帳名流爭共仰荊州
辦香敬爲南豐設山斗遙瞻瑞靄浮

送觀察李公自蘇回省

點綴吳江楓葉秋喧傳錦纜促行舟劉弘一紙書爭得
郭賀三公德自優何幸南州逢闕里漫容北面仰清修
相思惟有秦淮月直待賓興問渡頭

贈楚中金使君

昔人仁恕示蒲鞭今日推恩賴大賢千里定教河再潤
一琴堪並鶴同船臨淮鹿應三公兆蜀郡民歌五袴傳
但恐九重徵宋璟鳳銜 丹詔下遙天

壽朱柯亭太守八十華誕

脫却朝衣作散仙欣看滄海現桑田樓臺不似紅塵境
雞犬都昇白日天回首南柯成一夢笑吾東溟待三鱣
問君輕舉緣何術曾侍瑤池王母筵

自嘲懷沈溧山

閉門罵世最波瀾罰作崇川一教官詩句刪完千種傲
性情變得十分酸人皆盡道如何好我獨無過遊戲觀
惟願麴生來共坐大家沉醉作糟團

戲贈扶風君

宦遊無定類飛蓬
桂玉支撐賴汝功
羃布遂成新闡範
釵荆不改舊家風
雙扉但恐題凡鳥
五夜猶嚴訓兆熊
只有一端真莫解
幾時學得是癡聾

君拚小醉驅愁藥
我寫長篇遣恨歌
雅謔每教君合口
巧言常令我迴波
衰容復變朱顏嫩
禿鬢重生黑髮多
子女兩傍親色笑
一門歡慶是如何

渡浦懷唐春江

一片閒情狎野鷗
半帆低挂送輕舟
柳新放綠增青眼
浪老無花竟白頭
雲暗海天魚起舞
風迴江國客生愁
便須急作丘園計
早脫名韉得自由

臨行寄梁溪邵衷彝并令子上九

一葉遲遲未忍行
嬌兒無奈繫人情
印囊積雨生莓暗
車幕交春映雪明
何苦竟拋萬事去
細看不值半文輕
板橋流水垂楊岸
新雨相思正濯纓

顧良哉孝廉地隔百里聞予歸家拏舟枉顧作此

酬之

一江風送孝廉船
誰遣來尋無定禪
五柳豈能違故里
三鱸空自說當年
神交久識君知我
貌陋安能醜變妍
聞道萬言曾進御
幾時召對燕金蓮

良哉曾作萬言書
進上故有是語

謝大中丞吳公紫陽書院試士作

東南桃李已栽成
小大從公駿有聲
祗爲朝廷端士

習共瞻牛斗煥文明珠含川媚光難掩玉韞山輝美畢
呈會見 九重須燮理安排鼎鼐待調羹

雲間大都督趙公捐俸修理學宮振興文教予在
崇署聞風懷想作此以申景仰之意

雲屯魚麗鎮南州將士真同挾纊遊緯地經天徵駿烈
左圖右史見鴻猷共知貴重推元老竚看明通拜列侯
文教振興端有賴望風懷想欲依劉

挽李節珊

傳聞天上隕文星遙望東南涕淚橫珠桂半生常不給
琳瑯滿架與誰爭空梁剩有辭巢燕喬木終輸出谷鶯
女嫁男婚猶未畢子規啼血到深更

過尚湖

尚湖西去路綿綿一片征帆落照邊寂寞殘花四五點
蕭條破屋兩三椽荒山靠澗鷗常立廢寺無僧犬獨眠
夾岸綠楊搖不住似曾相識廿餘年

過虞山寄梅崖司馬時署常熟縣事

披衣曉起一周旋尚父湖邊風景妍蘆荻帶霜寒入骨
鷺鷥飛雪冷衝煙石梁隱隱遊人臥土窟層層狡兔穿
莫怪片時留不得挂帆已過海隅天

舟中懷膠城施呂谷諱麟吳江錢遠亭諱守松陵

沈方陶諱世石湖吳岐源諱本維揚陳適仙諱

堂公山鐵岡兄諱御

十五年來絕浪遊豈期重泛此扁舟
天空似水盤真炁雲澹如山寫素秋
楓葉落殘驚睡鴨荻花飄盡起眠鷗
何須苦憶家園樂一路文星足唱酬
袂衣初試曉猶寒桂楫輕搖過石灘
斷岸疾風摧狗尾敗墻濃露濕雞冠
鄉黎望歲延殘喘村犬無聲畏長官
我欲與君同作賦補瘡剜肉恐難看

憶亡妾華氏浣芳

十年一夢曉煙中霧鬢雲鬟總是空
猶憶問名榆正火漫看結帨月初弓
生成秀色文君似吟得清風道韞同
錦纜牙樯歸去好鶯忙燕亂蝶朦朧
盈盈十五善談諧每向人前慣使乖
問字未甘先帶笑

下碁將負又拈牌臨窻小試銀塗鼎
背客偷描金縷鞋可惜慊慊終歲病
病中長守太常齋畫樓高處曲欄邊
約伴同行愛占先撲蝶會中吟柳絮
藏鈞隊裏賭榆錢亦知粉黛非真色
每向釵笄歎逝川寂寂可憐墻上月
一簾雲影蕩寒煙

學步空明徹夜吟漏深寒月冷相侵
偷將宋句翻新調竊得唐人作好音
不覺嫩紅潮上臉難勝虐謔淚沾襟
高山流水憑誰賞枉自敲殘碧玉簪

蛩鳴四壁轉淒淒螢火微微點燕泥
對月每橫三弄笛挑燈時聽一聲雞
宜男草畔尋芳信好女花邊憶舊題
最是晚妝忘不得挽雲纖手露柔荑

夜窻聽雨最分明風打芭蕉歷亂驚靜院冷煙圍半閣
麗譙哀角咽殘更微吟宛似流鶯語小楷尤能按步行
不信鬪茶成絕調品泉時與又新爭

一杯醇酎略沾唇兩頰桃花色帶春自贊自嘲成別恨
宜嗔宜喜轉相親芙蓉江上憐愁客鸚鵡籠中解罵人
獨有無端兩行淚醉殘明月露天眞

望吾得子產嬰孩姊妹行中次第猜燕姑果能徵異夢
秦松誰肯信凡材無勲善謔同殷羨有賞昌言始郭隗
乞養便能如已出試啼幾度笑顏開

撫兒三載意綢繆喜亦含胎近一週我爲悼亡悲別鶴
君因產難作浮漚匣中徒有琳瑯歎鏡裏空含珠玉愁

惆悵杳然封馬鬣蕭蕭宿草白楊秋

幾回不信杜蘭香今日相看合斷腸夢到幻中尋失鹿
路當岐處覓亡羊麻姑豈肯爬仙爪玉女誰能吐電光
安得通幽窮碧落醉尋瑤草入華陽

贈某別駕

別施一榻獨分憂奕奕文光照上頭龐統自能展驥足
陳蕃眞不愧名流海沂有德人心服荆楚多材士論優
竚見上林春色好共看金埒驟驊騮

贈梁溪華豫原國博

諱希閔曾任涇縣訓導
兩中副車告假歸里

大器由來待晚成副車已被兩回驚當年若弗耽詞賦
此日何緣識姓名早謝簪纓歸故里復施脂粉擅傾城

可憐十載徒懷璧說到傷心涕泗橫

寄耿司馬

曾叨世講遡從游已隔栽培五十秋大德莫酬非壯士
小心常凜奉嘉謀可憐白髮無人問回憶朱輪益自羞
何意甘棠今更茂望光時厯識荊州

和王騰蛟悼亡詩

謝家咏絮才高女嫁與烏衣巷裏人教子事親俱足法
蘭心蕙質忽成塵孫荆情重文誰匹荀倩神傷痛自真
我亦與君同病者不堪回首洞房春

上毘陵李司馬

共樂仁風遍草萊口碑載道見鴻裁趙溫自是三公相

龐統原非百里才曾望龍光蒙顧問復親熊軾荷栽培
早知御李堪爲幸悔不相從荀爽來

贈江上某令

羣黎遍德沐恩光親覩鳴琴不下堂桃李千村栽滿徑
桑麻四野莩成行烹鮮小試人爭羨製錦鴻裁世共望
莫慮甌塵今又見范丹名姓有餘芳

九月二十日

是日係古重陽重踐登高之約

同人共說古重陽攜杖登高總不妨寺老至今巢鸛鵲
山荒依舊牧牛羊菊邊猶自思佳節嶺上殊堪望故鄉
借問杜康橋畔酒劉伶醉得幾千場

答和俞楠亭原韻

相憐何必更相逢趣味君知同不同青眼看人寧作我
白頭返老轉成童初驚燈焰還驚夢已遇雷聲又遇凍
噫噫天邊求伴侶空潭印得兩孤鴻

客中作寄懷鏡渚

桂花飄盡又黃花不道流光轉歲華一陣冷煙飛白鷺
數聲殘照落烏鴉誰人江上甘爲客若箇天邊不憶家
况我衰年過六十豈堪終日聽淫哇

上學使者

衡文南國樹高牙桃李弘栽爛熳花揀得青錢真萬選
收來白璧絕微瑕豐城劍待張雷鑿合浦珠含日月華
千載一時應僅見遙天極目煥雲霞

問渡寄翁馭臣

橫江一鶴獨凌空風送蘆花在望中舊綠未全凋岸柳
新紅已半麗山楓翠浮嶺畔脩脩竹聲徹雲間兩兩鴻
野渡不知何必問釣竿隨分老漁翁

倦游寄唐宸枚廣文

拂水西來近暮天不堪回首意茫然還思故國芙蓉夢
難忘新阡楊柳煙有子那須重憶子得年何必更祈年
此生已覺飄蓬甚打點南窗伴醉眠

過常熟懷雅臨四兄退谷九弟

一竿煙雨濕輕蓑夾岸殘花映碧波水到至清魚蕪少
山當孤絕鶴巢多沙邊亦有能言鴨籬外偏饒換字鵝

桃李芳園成往事那堪矢志歎蹉跎

登君山作寄沈溧山

海天漠漠凍雲生小憇高峰看鷺盟
幾片蒲帆江上老數村煙火望中明
碑題季札書真古酒到劉伶巷最清
獨有怒濤流不盡年年白浪打孤城

答和琴川趙文起原韻

楊穿七葉喜聯翩我獨頽然作散仙
猿鶴漫驚離峻嶺煙雲空笑落遙天
豈知漢武書三篋絕少孫登琴一絃
蒙賜瑤章真有愧那能桃李遍新阡

贈公山鐵岡長兄

聞道琴川別有春森森桃李鬪芳辰
仲雍山畔栽培厚

尚父湖邊雨露新江左共推經史庫
淮南舊屬老成人講堂原是先賢里
小試牛刀化自神

步邗城陳適仙集四郡僚友會朱氏園亭原韻

耆英高會共銜杯裘屐翩翩次第來
幾點寒鴉橫冥漠一池清照浸亭臺
殘花細草隨風偃曲檻低窗傍澗開
髣髴西園成雅集醉吟斜日莫相催

贈梁溪十齡童子楊潮觀

玉長崑岡迥不同一枝瓊樹發菁葱
紙田墨稼傳家舊鐵畫銀鈎折筆雄
聳壑定應推令器慶門今復見竒童
從來早慧稱徐鉉也在髫齡十歲中

贈長洲朱公季

諱奕恂

傾蓋談心喜乍逢又勞蠟屐訪孤蹤自憐竟作池中物
誰道終非壁上龍一草一花閒點綴三千三百少從容
何緣幸遇朱公季如坐春風到晚春

贈玉峰徐司訓節母十五歲守志今壽登七十有
四矣司訓迎養署中作此表之

十五移天命不辰柏舟比節有誰倫撫棺一慟甘同穴
教子三遷擇比鄰豈料享年成白髮那堪回首憶青春
膝前捧檄同毛義微祿欣能得展親

曹熙如編修枉顧不值明日報謝漫賦一律

廿年敝盡黑貂裘一旦驚看兩鬢秋老驥漫勞伯樂顧
焦桐豈望蔡邕收春風入座簾鉤靜晴日臨軒花影浮

親炙丰神如玉立夜光燿燦墨香幽

酬唐佑一孝廉同令子蘊竒自玉峰過訪

玉山秀絕產名賢唐勒鴻文世共傳陳氏佳兒堪跨竈
崔家令子待摩天滿船載得書千卷片刻吟殘手一編
信宿祗嫌相見晚渭城莫唱惜離筵

庚子元夕前四日訪新鎮葉司直妹丈留飲承書

堂中同曰生于岡兩甥劇飲看蓮花燈賦謝

華燈燦爛照瓊筵深院光浮五色蓮幾朵並頭疑映水
數枝巧笑欲籠煙誰家高擊催花鼓許我長歌覓藕船
一醉不妨成潦倒主人情重月當天

元夕與兆熊閒耍看蝴蝶燈

燈市闌珊煙火稀偶從海上放舟歸潮痕侵岸潛生綠
蘆筍穿沙漸欲肥柏酒不辜松竹興梅香還染芰荷衣
呼兒莫負良宵夜剪紙能教蛺蝶飛

戲贈懼內客

驚聞懼內失常經此信傳來自鵲鴿白日豈期逢魍魎
青天不料得雷霆懾魂別約三章法流毒能淫十指刑
若比河東獅子吼一般穢德有餘腥

懷胡佑人宋又韓併令子宋恪亭暨及門諸子

老去頻爲海外行片瓊無那寄滄瀛相思惟有梁間燕
惜別尤憐花底鶯自愧四知常凜凜羣推一鐵獨錚錚
謝他桃李休相絆白柰朱櫻在碧城

促裝與陳大持社長暨戴晴江壻話別漫賦

驪歌重唱意如何尊酒流連別思多已去韶華纔擺脫
未來愁緒莫經過牽人金柳千條線送我青山九點螺
決計早爲尋甫里一竿長把釣煙波

曉發婁東懷王範之焦廣期兩君

花信今番第幾通夜來急雨打船篷孤城出海無多路
巨艦橫江盡待風鄉夢不勞縈客思故交何必問途窮
山莊茅屋殊堪憶朱李紅桃引碧桐

客館漫興懷陳含美暨家衡三大兄

冷香庭院早簾開盡日相延燕未來孤館亂煙縈古木
遙天疎雨點蒼苔清芬剩有驚雷莢雜淡欣看索笑梅

安得日晴尋勝樂相攜仙侶跨蓬萊

新河鎮遇風雨

經行東海仲春天昨日清明過禁煙
燔祭苦思如芥內紙錢還憶若堂邊
鬚如鷺白緣愁暗衣染猩紅着雨鮮
歸路不堪風又急泥塗無柰漫周旋

酌錢塘朱先生

鸞章翠軸賜書頻龍勺彝樽比德真
玉海千尋難見底金山萬丈杳無塵
寵逾華袞傳來簡價擬連城間出珍
何日南州瞻闕里好風嘘拂沐陽春

上鎮臺陳公

海疆波浪寂無聲弭盜安民見化成
暖日堂簾風蕩颺

麗譙更鼓夜分明談詩親侍元戎帳
尚德羣推君子營久沐恩光勞拂拭
可憐學嘯愧新鶯

懷似齋王明府

九秋把袂闔閭城話別相思繫我情
共仰和風噓庶類可知惠露澤蒼生
三年定見民皆阜暮月先看政有聲
但恐 禁垣虛左待又勞 丹詔促行旌
誕辰憶得丙申閏上已有感而作

生辰誰說年年有置閏難逢三月三
江上剩蘭容再佩陌頭殘薺許重簪
海棠帶雨嬌還怯楊柳籠煙困已酣
兩度羽觴流曲水可憐衰鬢我何堪

郊行有感寄長洲朱公季

嫩綠娟娟遍海邊亂紅歷歷點山前因思谷水花如雨
還憶崑岑柳似煙解組季鷹才九月投簪元亮僅期年
兩公若不歸來早松菊尊鱸誰與傳

袁子麗貞以尊人纂輯四書要達見惠作此酬之

聖賢要旨杳無垠不是鴻儒達不真闡發定須傳述手

修明端賴博通人延之

袁逢吉之字宋人五歲能誦爾雅孝經七歲兼通論語尚書

淹貫堪垂世思正

表默之字亦宋人學問淵深為時所宗

淵深迥出塵壓

倒青箱王氏學惠風披拂及陽春

悼表姪周策銘編修

玉堂簪筆老詞臣冷署蕭蕭白髮新曾奉

皇程萬里

命已沾

帝眷廿年春豈期不祿妻先殞更痛無兒家

轉貧今日銘旌歸故國悲風遙捲綠楊塵

示戴壻晴江兼悼其尊人瓏巖

諱有

修撰

而翁曾奪大魁來何意文星殞夜臺一世功名俱是幻
十年聲價竟成灰纔過下壽窮愁老不及高軒懷抱開
囑爾後生須努力丹梯好覓近蓬萊

崇川 萬壽節朝賀後卽於 闕前觀梨園演劇

錦棚燦爛簇花燈夜漏沉沉到五更香氣似雲籠寶座
月光如水浸霓旌瞻 天旋聽歌聲細祝 聖還看舞
態輕自愧爲儒慚莫報濫叨祿養賀昇平

寄華豫原國博

不省窮愁解著書冷檀何有戀華裾迎牲拜聖三更後

待漏朝 天五鼓初唱和豈能忘脚本追隨無奈要肩
昇急須傲爾休官去日上窻紗照睡餘

過金鰲山同幔亭內姪

一拳高簇見金鰲此日經過第四遭朝霧捲煙迷古刹
春風和露長新蒿王孫江畔招愁客公子花間喚酒豪
獨我倦游成潦倒不堪重與踏林臯

與黃如九吳雨洲沈旣閑閒敘

蘭玉香浮日乍陰睡餘無事聽鳴禽詩人老去成仙骨
名念消完剩道心得酒何妨閒遣興對花聊與共長吟
家山猿鶴休相訝三徑依然入夢深

獎貞女陳氏係周南之室

吏人與我駕巾車冒雨衝寒爲式閭苦節半生存短髮
貞心一點伴長噓茅簷僅僅三間小菜圃剛剛二畝餘
哀慟數聲堪悵絕杜鵑啼血五更初

謝大叅魏公華筵

濫叨噓植列賓筵一部梨園態度妍春暖正當衣袂日
風晴恰是養花天南州座上談詩禮北海樽中樂聖賢
老病自知應放棄敢云七葉舊貂蟬

贈原任崇川金守君

諱炳

慈恩雁塢久題名知爾胸中貯甲兵講武遠過唐大帥
論文常鄙魯諸生堪憐智勇餘三略剩有窮愁擁百城
今日一官留不得仰天長嘯欲吞聲

上鎮臺陳公

有敘

僕一生樂道雅慕林泉豈料桑榆濫叨祿養柰
一事未諳動而多悔况蒲柳之質易于凋零乞
放歸田里得遂餘生使之調養天和少延殘喘
他日病痊之後一葦來崇俾黃童白叟遙指之
曰此大將軍揖客也顧不美耶作此致謝

鬚似霜花鬢似銀那堪海外作儒臣過蒙師道寬容我
已覺官箴束縛人 聖代雖然無棄物滄波豈必老窮
鱗他時飲水衡門下一瓣心香奉後塵

答贈李晚聯

諱杜詩

江河日下水如煙一柱安能障百川稍有放言酬歲月

竟無幻術敵神仙衝開文陣君真捷打破愁圍我最便
每鄙挂冠陶靖節歸來乞食受人憐

午睡懷維揚陳適仙壽春鐵岡兄

日午風晴睡正濃湘簾花影影重重非魚安得知魚樂
化蝶方能解蝶慵波面定教多潑刺花間殊覺少從容
詩人不入尋常夢海氣昏黃到晚春

對景懷錫山楊右丞暨介公并志萬

消愁無那發長歌竟日相看別致多春水綠羅裁燕剪
晚桃紅錦織鶯梭半窗芸葉攻書蠹一盞茶香醒睡魔
忽憶九龍山畔客幾經矯首望嵯峨

謝副總戎冉公送席作

差池紫燕拂簾櫳又見棠梨一小叢極目親朋雲水外
關心兒女夢魂中江邊細草層層綠嶺畔閒花朵朵紅
何意王弘送酒到拜嘉旋與醉春風

謝別大總戎陳公

幾回戀別接顏溫倒屣頻煩出大門博士未堪求脫穎
將軍誰不信平原褒逾華袞詩偏勁座入春風道自尊
衰病敢辭歸故里拜恩雙袖淚沾痕

謝別大叅魏公

兩年食德快平生絳帳宏開賴玉成忘勢每煩頻顧我
論交何意及難兄家孟少宰諱集與道臺令獨憐只合
兄諱勣俱爲丙辰進士尋三徑自問惟堪擁百城蒙賜瑤章金石句捧歸開卷

夜珠明

謝王似齋明府送別

一違故國動經年且喜扁舟泛海天龍伯効靈波浩浩
雲根獻媚草芊芊鱸堂未敢唾前哲民社相看屬大賢
豈忍河橋折楊柳渡江還與寄魚箋

謝叅戎冉岳馬何四公及金林袁蔡四君送別

朱輪繡轂翩翩至金勒銀鞍得得來刀劍拂空雲日暗
旌旗夾岸海天開重蒙贈別多攀柳無奈思歸欲種槐
強弩輕車何足數諸公盡屬不凡材

謝齊樗叟學博送別

這回真箇謝同僚話別江濱正候潮鷗立豈能依客艇

燕飛偏自戀僧寮君應送我空惆悵我轉憐君太寂寥
破屋數椽消受盡不須重學楚宮腰

謝二尹周君及少府章君送別

風月尋常慣浪嘲吟成未穩費推敲哦松樹底尋崔立
射鴨灘頭覓孟郊憐爾鳳鸞棲枳棘愧吾麋鹿戀蓬茅
何當利涉煩相送讀盡同人于野爻

謝鈕星濤孝廉及令子聖也太學少叔孝廉送別

自從瀛海爲司訓幾度江頭話別離當代文章超漢魏
一門孝友屬墳箎醇醪不數周公瑾和煦真同柳士師
坐我春風將半載素心惟有兩人知

謝合邑搢紳諸先生送別

裘屐蹢躅古道存如雲氣誼重王孫詞源不止流三峽
德意爭看贈一言小草正當成遠志茂才端合賦高軒
那堪攀盡長堤柳南浦煙波合斷魂

謝崇川諸同人送別

東瀛桃李自敷榮老去歸休隱姓名只擬潔身尋甫里
敢勞泥首送先生

揚帆之頃重蒙望舟揮涕遙拜海濱

海邊玉立看千樹

眼底鸞停待一鳴羣聚豈能同鹿豕片帆高挂出江城

謝高人逸士送別

莫嗟滄海變桑田轉眼桑田又變遷一向浮雲看富貴
從來傲骨託神仙非無高士酬三爵亦有才人賦百篇
早脫朝簪便歸去不須搔首問青天

謝合邑節婦及節婦之親戚送別

嫩晴天色氣微和雙燕踟躕理舊窠烈骨只疑海外少
冰心誰道此間多惟留片語標黃鵠稍慰重泉施音綠
蘿送別江濱成一慟三聲猿叫出洪波

謝合邑營士及里長送別

從無一德及兵民何意殷殷戀我真仗劍盡爲儒雅客
捧香俱屬老成人黃童白叟來江滸遊奕凌波列海濱
珍重先生同下淚挂帆風斷隔煙塵

舟中即事

布帆催動木蘭船無復鶯聲到酒邊高樹直欹南浦下
亂鴉羣集北山前澹煙冷火疑燒鬼駭雨驚雲欲洗天

惆悵此情忘不得歸時猶恐被愁牽

歸隱

歸來臺榭草萋萋掃逕呼童鶯正啼香裊鴨爐嫌閣小
酒粘螺盞愛窻低庭多別趣花常滿松有餘閒鶴待棲
贏得丹丘留姓氏敬書玉簡濕金泥

學道

柳深煙膩楚雲低澹寫春光滿綠隄歸里淵明初責子
臥山和靖已無妻三江新漲沉帆影一路殘紅沒馬蹄
從此閉關長內視下場好覓上天梯

贈奕山弟

幾回春草憶池塘看破名場作戲場愁裏打開魑魅陣

睡中勾入黑甜鄉筆花寫盡江郎夢藜火分殘太乙光
一瞬桑田成幻海好為攜手說蠅娘

贈南映姪

珠還合浦見嘉猷萬里乘風願少酬彩筆直追唐刺史
蒲鞭爭頌漢諸侯斑衣試舞娛今日紫馬行春憶舊遊
分路揚鑣應有待家山泉石且盟鷗

朱北才同汪聖安枉顧汪彈琴一曲作此贈之

閉關寂寂道心融看徹塵緣盡是空蟻蝨功名杯水外
觸蠻事業磨盤中夢回不待黃梁熟耳暗還憑玉軫通
一曲古音彈未竟薰風婉轉入簾櫳

空明先生詩文序

竊聞先生長者之言曰文以載道道之所積揚而為雲

揚卷尚志

漢昭而為日星峙而為山嶽流而為江河蕃衍輝華而
為禽獸草木變而通之神而明之而為雷霆風雨鼓舞
戰鬪蛟龍出沒鬼物隱現之不可端倪此六經之所以
與乾坤相終始而後之君子有所著述足以追配古人
不朽而存者皆是物也夫如是則棠也何足以知叔父
之文哉顧羣從子姪中棠年差長侍叔父之日為尤多
平日目濡耳染竊窺一二大節而知叔父之文無不合
於道也叔父幼稟夙慧內行敦篤律已則堅中而廉外
持家則節儉而當禮御物則公而正臨事則智而明訓

空明子集序
誠子弟則勤勤懔懔若惟恐傷其意而卒歸之於義生
平手不釋卷自六經子史以及百家之說無所不究間
有所發明率多前人所未逮然而世歎有知叔父者叔
父亦不求人知也歲戊戌以明經選授崇明縣儒學訓
導人或以叔父之才當在承明著作之林而官冷曹于
海上爲非宜叔父曰否否師者人之模楷學校者教之
所宗道之所從出也吾方懼無以稱厥職其何敢辭旣
至謁先師仰榱桷視棟宇闢草萊施丹雘而廟貌爲之
一新祭之日飭俎豆拭几筵考樂器潔牲牲而祀典爲
之一盛於是進諸生而稽之以實行課之以經義訓之
以文學凡所講習皆倣胡安定先生之法務在通經而

適於當世之用訪民間行義節烈之事得二百餘人告
之大吏以旌其門而海上之民風士行爲之一變如是
者期年叔父曰是亦足以見我志矣遂飄然而歸閉戶
課子益肆力於詩文夫以平日之修己正家也如此一
之官而所行卓卓又如彼非行道而有得者能如是乎
夫是以知叔父之文之無不合於道也至所謂空明者
蓋嘗致力於先儒定性之學以存養省察之功積而能
全其虛靈不昧之體故以自號遂名其所著之書歟書
旣成謹識之簡末庚子孟秋原任廣西桂林府知府今
候補按察使司副使姪棠百拜草

空明子文集目錄

上卷

釋空明真諦

王介翁讀明史詩序

義僕顧進英傳

遊金鰲山記

往蓉城記

德福山莊記

小紅因果錄

下卷

爭論

楊右丞歷試草序

唐上采先生傳

自雲間至崇川記

東沙偶記

登君山記

金氏現報錄

延恩院碑文

希聖篇

歸途述

題楊雲書養正篇卷首

育嬰徵信錄書後

羣鴉噪堦喻

參三說

先兄補三先生事狀

文學麟書陳君墓誌銘

儒學赤霞吳君墓誌銘

先兄蓋修先生墓誌銘

亡弟蘇山先生墓誌銘

空明子文集上卷


壽春兄鐵岡先生選

華亭張

榮景桓著

釋空明真諦

八月既望至金閭寓百花洲上獨坐且寧軒下有道者
 衣冠不整叩門求見坐定道者問曰空明空明空乎明
 乎予曰空明空明空矣明矣道者曰空在何處明在何
 處予曰空在空處明在明處道者曰空既雜明空有未
 盡明既雜空明有未全得毋微疵乎予曰空即藏明空
 無室塞明即藏空明無障礙寔有相資也道者曰空如
 懸磬明如懸鏡可得似乎予曰未也道者曰空如天圍
 地明如水浸月可得似乎予曰未也道者長跪稽首曰



空明子文集上卷
可得聞歟予曰執空論空天地跼蹐執明論明日月薄
蝕去空說空空有虛實去明說明明有變易以空爲明
私心探索以明爲空妄生度臆以空爲空愈空愈塞以
明爲明愈明愈黑道本無外廣而不窄道本四通光而
不匿空中有明明似有色明中之色無象可即空中之
空穴駒微隙明中之明爝火不熄真空之空纖埃不隔
真明之明秋毫必晰真空而明上下一白真明而空萬
緣都息乾坤未判其空罔測水月未交其明曷極空中
之明吉祥竒特明中之空不涉形迹非空之空無境不
寂非明之明無影可逆非非之空樂此安宅非非之明
消彼陰魄既空而明光彩潤澤既明而空渾忘翕闢本
來面目無知無識廓然洞然守我正則保爾真无是謂
寶德知此道者庶幾有得道者稽首載拜曰老聃復出
不是過矣別去不知所之令人踪跡杳無影響究不知
其何許人也

楊右丞歷試草序

予至蓉城獨坐客館間與梁溪諸君子游聞楊氏族甚盛羣從昆季文章輝映後先接武世莫能比然而未之見也浹月有友人偕介公至兼攜其從子潮觀俱來介公溫文爾雅談吐皆成珠玉潮觀年始十齡能書斗大字讀書過目輒便了了對之不覺驚喜狂叫欲絕介公卽命潮觀修弟子禮予愧謝不敢當強而後可又數日介公侍大阮右丞枉訪予是時始識右丞但見風流蘊藉玉屑霏霏眼光時時射人令我肝胆盡傾自覺形穢坐片刻隨出其歷試草問序於予予閱其文雄深雅健秀穎光潤突兀排宕兼而有之試輒冠軍有以也詩歌

奪唐賢之席書法登晉人之堂諸君子皆以屢躋名場
爲右丞惜而予謂不然使右丞早售於時不過與坐玉
堂侍彤墀高車大馬衣輕齒肥者等耳烏能發其蘊蓄
吐其詞華有如是之驅濤湧雲倚天拔地者哉况乎天
之待庸才與待竒才也則有異其待庸才也唯唯諾諾
脂韋成風奔走乎權要竊取乎富貴錦衣衣之玉食食
之志氣揚揚畢生以老其待竒才也必爲之困頓之折
辱之偃蹇阨塞之使之俯仰無資進退維谷堅其獨行
其道之志鍊其百折不回之氣增其問學純其心術益
其聰明以老其才然後出而用世方能陶融景化黼黻
太平當世之人引領而望之曰作霖補袞其在是乎是
誠一代之全人也今右丞之久困於諸生正天所以眷
顧而不使之苟且倖獲也其歷試諸草直鳳之一毛龍
之片甲耳何足爲右丞重雖然豐城寶劍衝斗于霄其
光芒正不可遏抑又安在一毛片甲之間遂不足以窺
其全體也哉

錢塘王介眉讀明史詩序

大凡源遠者流必長根深者枝必茂有由來也予因司
訓崇川時與邑侯似齋王先生游見其議論丰采文章
政蹟皆有根柢向讀湯子遺書知先生爲潛庵及門高
弟然後知非沐浴乎大儒鎔鑄乎實學者必不能臻此
庚子仲春先生考校多士四方雲集予蒙不棄叨與末
席先生即命令嗣介眉出見少敘寒暄但覺旨趣深遠
令我鄙吝潛消其襟度之動人有若此者介眉知名士
也天資學問真足推倒一世平時所著制菽湧輪集三
吳兩浙間久矣膾炙人口丁酉闈中得而復失一時都
人士讀其薦卷無不爲介眉訟寃而介眉初不介意也

潛心大業志益刻厲枕籍經史貫串諸子百家融會而
出之豈獨超越前輩駸駸乎跨八家而上之矣隨出其
讀明史詩見示且爲之問序於予夫子烏足知詩哉况
詩亦未易言矣有有所爲而爲之者有無所爲而爲之
者有所爲而爲之者得志則寫其榮寵不得志則寫其
抑塞牢騷之氣無所爲而爲之者不過寫其風雲月露
鳥獸草木已耳總之皆無關於世道人心者也君子終
無取焉爾我更怪夫世之咏史者何比比也或借事興
懷或托物見志祇以一己之私見要非天下之大公安
能綜貫一朝搜羅衆說上而朝廷下及草莽將有明三
百年之君臣父子夫婦昆弟朋友之間凡傳疑者則采

諸家以表暴之正史之所不能明言者則叅野乘以校
訂之虛其心和其氣闡幽明微彰善癉惡要歸至正使
一代之是非功罪盡平反於筆花墨瀋之下一字褒貶
榮於華袞嚴於斧鉞以非常之才具獨斷之識一掃衆
咻獨出已裁凡此者皆以存三代直道之公也煌煌大
篇光燄萬丈謂之詩可也謂之史可也俾讀是詩者昭
然見世運之盛衰良非無故也其有功於世道人心爲
何如哉今介眉年始逾壯竚見蜚聲上苑聳翮雲衢坐
玉堂之署照太乙之藜握如椽之管撰勝國之史不於
是編肇之乎介眉本其家學發爲詞華皆尊人似齋先
生有以啓之也予不敏烏足以知詩請即以鄙語還質

之似齋先生

唐上采先生傳

大凡德足以滿其量者才或短於肆應才足以濟其用者德未必其純全甚矣才德之難於兼備也我於海上先生獨有取焉先生姓唐氏諱華字上采上邑之諸生也先生之父鄉飲賓號曰震揚震揚公家道素封爲海邦望族生四子先生居幼遺業甚厚而先生獨能義讓三兄以故室如懸磬而先生怡然自樂不以德色示人其友于兄弟若此一生好學經史百家以及方技之書靡不博覽至古希時猶手不釋卷性至孝震揚公壽登九十有五母夫人亦九十有二家雖貧甘旨弗缺問寢視膳必誠必敬鄉里無間言及兩尊人相繼臥病三兄

俱屬七旬內外力不勝支而先生以半百之年獨任其勞湯藥必嘗衣帶不解及病革哀毀骨立喪葬盡禮聞者罔弗感泣持已益廉待人益恕雅尚節儉見有鮮衣盛饌者必諄諄以惜費爲囑其於子姓尤不稍寬假長兄去世竭力營葬遺二子俱不克樹立長者廢業早卒幼者流落不偶先生招之歸爲之完配以續冢嗣姊適沈氏年未三十而寡有子尚在髫齡先生周給賑恤以濟窮孀及年老又命時琳兄弟呈請當事得邀旌獎舅母張氏寡亦請學臣給匾使兩家節孝不致湮沒母舅包公永家貧乏嗣包于揖亦暴露日久先生卜地葬之時有奸棍阻撓智力俱憊始得峻事更倡義以葬其受

業師張才甫惟拜颺姚君三喪未舉臨沒時猶引爲餘恨素性亢直凡遇強凌弱智欺愚者必正言苦口以息其紛爭一時雖逆耳後鮮有不悔而知感者其盛德之及人要非流俗之所能仿其萬一者也訓誨子姓最嚴館課文字親加批閱以別勸懲所以長君時琳與猶子文昌聲傳俱能樹幟文壇爲一時名士孫男方沂早慧十齡時即能作詞曲先生切責之使之專心舉業今方沂淹雅博洽珥筆史館以爲一邑之光豈非先生之教澤有以致之乎寢昌寢熾正未有艾也先生生三子長時琳廩貢生候選訓導次時珪早卒幼時琰候選郡佐孫五長方沂華亭縣學增廣生由集成館纂修今奏敘

教諭餘俱幼業儒予不文烏足爲先生重然與長君宸
枚交旣久又最稱莫逆承命之下敢不勉力從事故不
揣荒陋而爲之傳

義僕顧進英傳

己亥歲予至崇川隔數日席少煖卽命諸生爲我訪求
節孝及畸行高隱輩未半月舉節者紛紛而他無聞焉
嘻何其異也爲問天地英靈之氣竒傑之概曷以不鍾
于男子而獨鍾于婦人也浹旬有以顧進英之姓名相
告者予竊疑焉天下必無是事更必無是人也令人潛
訪之而孰意果有是人也予猶未敢信也嗣後往返公
務不在崇者幾半載庚子孟春孝廉鈕先生亦以顧進
英爲請予益訝焉天下而果有是人安知不果有是事
乎于是密加詳核而孰意果有是事也有其事事不可
以不傳有其人人不可以不傳今將其始末聊錄于此

顧進英崇川某氏僕也某氏早卒妻年甚少子尚在襁
褓中家小康宗族有利其貲者迫逐再醮氏不從抱所
生子泣謂進英曰身死不足惜奈點點黃口何進英曰
主母無恐身能力爭之事或不濟則當繼之以死決不
致落虎狼口也訐訟經年事稍定幼主年漸長與之婚
娶娶後連產五子年未壯而又夭姑媳煢煢相依爲命
進英將主人所遺五百金經營拮据爲五郎君延明師
擇良偶事畢進英年已八十餘矣因請主母跪稟曰老
奴今日可以告無罪矣向所付五百金除廿年婚娶喪
葬用度外存銀五千餘兩請分授五郎君奴有五子亦
請分給五郎君五子感泣曰我輩受大恩君五子豈敢

復以廝養相待請歸君贄券以報大德進英怫然曰主
人視進英爲何等人耶苟欲出姓進英寧不能肥家自
贖而將五千金盡付主人耶此愚者所不爲而謂進英
反爲之乎進英雖有五男家無長物五子各歸一主不
令凍餒足矣豈敢復有奢望乎請受毋容辭于是五子
不得已受之進英仍在五家總理家政羣聽約束不稍
暇每見小主人雖在提抱者必拱立曰名分所在不敢
自欺也今進英年已九十餘歲五主人請以孫男一人
相贈進英曰身老矣舉動需人承主人厚意念我年老
亦不敢固却隨將預辦方物貨得八金歸於五主主人
弗受進英曰蒙賜一孫恩也奉償身價理也非理之事

身不爲也前旣不受五子今又豈能空受一孫乎五主
愧謝而受予遣人邀致與之行主賓禮命之坐逡巡弗
敢當宛然一知禮之君子也步履矍鑠顏色不稍衰真
千古一異人也因旌之曰義風一邑嗟乎嗟乎若進英
者卽以之風一國可也以之風天下亦可也彼爲人臣
而不肯盡忠于君父者視進英不亦愧死哉

自雲間至崇川記

自雲間至崇沙地不三百里一云海外便覺可驚可愕
予性本淡泊不樂仕進初聞崇川之命如坐寒冰頂冠
束帶直同桎梏勉力赴任親朋祖道者雲集匆匆話別
席帆一片鼉鼓數聲由九峰道中衝煙捲雪而去兩岸
綠陰正濃黃鸝時時作好音悅行客過青溪城垣頽隋
藤枝蔓衍無算未幾至趙屯橋人煙寥寂出吳淞江湖
流西上入文浦過崑邑望玉峰壁立天外使人塵襟頓
爽又半程則爲婁東弁洲山人之故趾在焉問之士人
云荒煙蔓草幾不可踪跡歎息者久之無何抵劉家河
口卸帆收柁謁天妃登海舶隨波上下一望無際但見

空明子文集卷一
漁舟三四點沙鳥幾羣出沒於洪濤浩渺中若隱若現
水天一色顧而樂之初不意人世間有此幻境忽見片
雲頓起風亦漸狂舉頭四望已入施翹河矣大雨如注
行囊沾濕殆盡吏人攜襍被寓龍王廟側假寐片刻有
僧叩門云自江南來者謂予曰海水橫飛掀天震地君
聞之乎怒蛟起立簸浪翻濤君見之乎予應之曰有耳
斯聞何謂不聞有目斯見何謂不見聞聲移耳聞者耳
之賊見物移目見者目之賊聞見不雜耳目不眩不聞
之聞勝於真聞不見之見勝於真見不敢有聞不敢有
見返照內視靜若止水不知有聞不知有見光明正大
包羅天地聞非所聞聞亦不聞見非所見見亦不見至

人無欲不貴耳目守我太空是謂大同僧謝不敏遽然
夢覺

遊金鰲山記

嘗讀稗官家見高宗在藩邸時有道人來謁題詩云牡
礪灘頭一艇橫夕陽西下水如傾與君不負登臨約同
向金鰲背上行即辭去南渡後金兵日促避難海濱泊
舟天賜場見道左有一山高峙問舟子曰此何山也舟
子曰此名金鰲者是高宗憮然曰道人之言其有徵乎
隨登岸盤桓者久之予常神遊其境恨不得踞其巔一
望大海之汪洋也豈料一官潦倒捧檄崇川追思往事
私心向往之然公務匆匆未暇談及閱月適有新河之
役僕夫戒塗戴星而往時當盛夏草木繁茂蘆荻盈洲
綠陰夾道路經于此相去約半里許車馬迅速又未遑

問及回時日已下午涼風時扇衣袂輿人亦覺憊甚且
徐曰盍往金鼇稍憇乎予聞之驚喜欲狂深幸此日之
不虛此行也隨停車顧盼但見古刹巍峩直插霄漢輝
煌金碧精光閃爍庭樹高柯蔽日時有流鶯睨眈其上
亦有僧人供茶道者掃逕轉至後殿益覺閒曠由曲逕
至偏廡折而東地益寥濶水一池方可十餘畝游鱗無
算清淺可鑒睂目其北則爲金鼇蜿蜒屈曲有峰三四
亦不甚高聳予登覽之際慨然有感爲問紫蜃吐氣東
西二洲在何處三沙在何處鶯蛇兩山在何處當日張
循王及宋貴妃別墅在何處但見茫茫大海滔天波浪
捲煙浴日噴薄無涯向之所願神遊其境者今一旦適
如我願焉快何如之然而十洲三島尚在海外琪花瑤
草雜植其中白鳳青麟翱遊其下何日駕赤虬騎黃鶴
與廣成鍾離輩呼盧豪飲一洗塵鞅使山靈海若乞詩
一章永傳人世豈不更爲生平之大快事乎魯陽不肯
麾戈輿人急急促返迨入城譙鼓已交二下矣

東沙偶記

予初至崇川聞汝南司教士論紛紜心竊惑焉及相見
衣冠不甚完好亦頗憐之檢點衙署盡爲無籍徒盤踞
在內問之知胥吏藉此以徵夜合之錢而汝南不之禁
也反覆諭以君子固窮之道始得遂去學舍於是乎一
清翼日考校多士兼閱騎射但見溫文爾雅雋永多姿
裘馬翩翩控縱得法向以爲崇在海外安能與內地埒
豈知竟爲不然乎然後知天不擇地以生材而人才有
獨盛於此邦者况俗尚淳樸士敦實行閨門嚴肅節孝
者比比予之給匾旌獎者約二百餘家俗不貧亦不甚
富雞犬桑麻較勝他邑有某令君者御下太寬隸役弄

法崇民苦之待士不以禮宮牆體統淪胥殆盡予委宛
規之而不獲特白之於各憲然後得以稍循禮法旋亦
遷轉崇之士民無不欣欣然歌 聖德之如天矣崇巖
邑也官舍荒廢已久頽垣蔓草中雖有破屋三椽豈能
僅蔽風雨孝廉鈕君諱滄號星濤崇之名士也性又喜客令
子少叔諱與予小阮名夢徵者爲同年友誼益真摯爲
予留焉華堂峻宇深院迴廊石甃雕闌名花雜植竒文
古篆充滿几案予喜甚然心不自安意欲他徙留益力
堅辭者再卒不可其多情有若此副帥冉公嫺家也重
蒙出郭郊迎一見遂成莫逆予本腐儒時宜不合每能
出其忠悃曲爲開導私心尤爲佩服監司魏公象山副

鎮尚公禮意殷勤迎送不拘常格予嘗有紀事詩云治
民督餉無雙目重道尊師第一人蓋實錄也至於大總
戎陳公尤爲文武全才氣邁今古不鄙疎賤禮遇特隆
時有肺腑之語諄諄相告予何人斯繆膺雅愛敬將投
贈七律一章及賜和七律四章刊之梨棗冠於拙集篇
首所以感知已亦所以志不忘也若夫紳士綢繆固在
意中兵民悅服殊出意表予自五月至十一月公務匆
匆奔走道路在崇不及兩月俱能相與有成如是是予
之幸也是不可以不記也已亥孟冬書於澄江旅舍

往蓉城記

已亥九月有蓉城之役心不欲往躊躇再四不得已勉
強就道道經玉峰過芭城湖水光山色一望可愛日下
午至虞山麓泊舟城下晤姑蘇郡司馬張公少敘片刻
即別去天益晴朗氣始肅遙望山頂土窟層層殿宇巍
煥石梁高跨歷歷可繪絕巘架空塗丹沃赭眩人耳目
拂水巖畔彷彿神龍行雨噴珠灑雪莫可端倪舟行尚
父湖波平若鏡沐浴雲日岸旁修竹蒼檜映帶飽霜楓
葉點綴麗秋圖一幅差為勝景水道漸曲且淺亦復窄
隘行三四十里有山峙岸側青翠欲滴喬松謾謾有聲
萬籟奔赴一派靜趣天機為之活潑過一二村落竹籬

茅舍中時聞雞鳴狗吠聲繹絡不斷殘蓼半欹黃花零
落若有惘惘可憐景狀農人築場圃愁歎聲不絕農婦
抱子負日徐行陌上面亦有憔悴之色因念西成告竣
正當雞豚報賽杯酒言歡婦子綢繆親朋酬酢何至哀
鳴瑣尾反若難堪嘉穀用登益無聊賴問之土人云催
科政嚴實猛於虎况好龍客尤不欲使我民有一日之
蘇也情感於中不能已已又半程至澄江矣僕夫定館
舍攜行李予亦隨之而往神少定問學使者與居適有
扶鸞者至予叩之疾書云天開文運光焰萬丈予方謂
遴拔真才文名特盛耳豈料十月望後狂童鼓譟將天
開文運匾額竟與轅門鼓棚同爲煨燼也哉然後知數
之前定有非人力所能挽回者也予因至澄而歷敘其
所見所聞若此以示夫世之不安命與不知數者

登君山記

君山峙澄江之西北隅若培塿然路徑坦蕩出郭半里許即爲山麓背負城面臨大江上有道院三四處頽垣敗瓦中香煙寥落特甚危橋傾圯草木凋謝鳥獸寂寂人踪罕至予登其巔松竹稍密日乍陰海鶴戛然長鳴與野鷹時時盤旋空際隔岸望靖江一帶水天莫辨但見沙鳥廻翔隨波上下布帆幾片出沒無定潮勢洶湧似有怒蛟起舞長鯨鼓鬣之狀莫可捉摸回首雲外浮圖筆立直插霄漢城頭雉堞宛若鱗比恨不從杜康橋畔沽酒百壺喚酒人劉伶與之痛飲一場消此塊壘也山有春申君黃歇墓游人每多題咏夫黃歇不過楚之

盜國賊耳烏足齒及雖然楚之王孫指不勝屈而彼獨能養士三千得與信陵孟嘗平原諸君同稱四公子以垂不朽亦人傑也哉

德福山莊記

莊去三林鎮不及二里許地名德福橋舊爲土著陸氏所建莊之所由名也莊不甚廣約十餘畝三面環水竹籬繞其外有亭有堂曲廊窈窕松杉暢茂桂竹間植春夏之交青翠欲滴時聞流鶯三四轉犬吠數聲尤爲幽絕朝日初升林煙未散鄰雞喔喔與隔池紡織聲繹絡不斷呼童子用活火烹名泉熱龍涎一兩片閒玩莊生秋水篇隨意吟古詩中韻語十來句紙窻木榻畔有無限佳趣豈復知人間蟻爭蝸鬪蒼狗白衣之變幻亭右數弓即爲先室延陵孺人葬處老人之壽域在焉又西其浣芳華氏之永宅乎扶風細君之生壙先建于左月

明之下但見白鳥高飛青燐迭出夜深人靜鼓琴一曲
奠酒一觴但聞孤鶴戛然長鳴故鬼新鬼若隱若現林
外復時時作鬼語四無人聲花影散亂捲簾掩戶殘燈
半明半滅淒然者久之復命童子煖酒一壺浮三大白
醉後狂歌使一鄉一邑之士知塵世外有空明子者在
德福山莊自得其樂有如是也因呼六齡童子兆熊執
筆記之

金氏現報錄

金氏者世居吳會祖本宦家僕也其父商於長安家累
千金生一子一女子早殤故愛女之心莫可名狀及笄
字於里人蔣氏子夫婦相得蜜如也夫利其貲氏亦矜
張特甚因歸寧而遂家焉當蔣氏求配時父欲遲之而
未許氏怫然曰爾欲使我墓木成拱而爲冥婚冀生鬼
甥以號溫休乎此必無之事也不若從之便父不得已
許之氏最不賢詈母及祖母率以爲常嘗指一婢謂祖
母曰當日爾之事人與此婢大略相似我父實榮爾爾
亦知感否祖母默然某歲夏父欲他往臨行囑家人曰
我爲女推命云明年大不利百事從之毋拂其欲而氏

空月子文集卷三
之作爲從此更覺怪誕元旦鮮衣華服脂粉成堆珠翠
盈握倚門顧盼自以爲豔冶過人富麗奪目一時喜動
顏色孰意明日夫之履忽爲鼠所啣又明日夫之衣暴
於中庭狗攀緣而上嚼半幅而啖之氏怒甚曰此皆婢
不謹之故杖之再而又呼母代杖之且以爲杖之不快
因狗鼠而怒及其母遂置狗鼠而詈及其母母以愛女
故杖婢再三女以怒婢故詈母不已泊晚方假寐間忽
驚醒語夫曰有黑面神擊我爾爲我禱之夫遂問卜求
神延醫服藥而怪症莫辨病勢日增至十五日血噴滿
室爛嚼其舌以死空明子曰孰謂天道無知哉方其父
推其命天鼠啣其夫之履狗啖其夫之衣氏苟能惕然
改行孝于親敬于長慈于下安知不消吝爲吉天或者
永其年亦未可定也而乃怙惡不悛卒蹈覆轍豈命之
果能修短人狗鼠之果能禍福人耶皆自作之孽也嚼
舌而斃不亦宜乎嗚呼孰謂天道無知哉

小紅因果錄

小紅本娼家子姑蘇王生姬也姬家廣陵三歲時父母俱喪隨舅之姑蘇僑居於虎丘之斟酌橋左姑蘇本富麗之場春秋每多遊屐一日舅出外姬倚門獨立見一生翩然而至錦衣狐裘富貴中人也斜睇凝眸目成者久之生回盼不已曰是兒丰姿綽約可置之金屋中矣由是延媒作合遂諧伉儷生豪公子也雖假號風流而胸無韻致况又受制于婦婦本秦女性竒妬生一事不合輒加捶楚故愛姬之心益切而畏婦之念愈深藏之別室嚴戒童僕令毋漏言未幾生偶他適事漸著婦知之恚甚搯刃以待曰吾不食狼子之心不止隨呼侍女

二十人各捧一溺器滿載穢物狂呼而奔姬方施鉛粉掃遠山獨坐窻下聞喊聲大震忽見一婦圓目豎髮高視濶步手持利刃直趨向前二十人之溺器竟傾頭一灌矣姬哀號乞饒不知所以婦且就穢中捉姬姬泣曰女菩薩賤妾何處觸犯尊嚴降此奇禍婦曰郎安在姬曰郎半年不來矣婦指揮二十人令搜之杳無影響婦曰吾且先殺薄情郎然後殺此臭婢未晚也呼侍女各捧空溺器而歸姬伏地良久猛醒曰此必郎所謂母夜叉者也婦出門路逢生生駭甚私心自忖不知作何異舉婦曰隨吾歸歸且詢汝生失魂喪魄立僵于地婦令侍女負之而趨既歸婦曰汝着迷耶何乃爲糞蛆所惑

生窘迫失措但稱有罪有罪婦曰我聞邪氣必須痛責令侍女重責二十板責已婦曰汝思此婢否此婢已置之糞窖中久矣生方悟糞蛆之言慌張無策淚眼未乾忽報小紅已自縊而死矣生曰吾害汝吾害汝婦見生哀戚之聲怒甚乃囚生于別館令曰有事勿與郎通且毋令私出私出者罰衆侍女曰唯唯已而斷髮裂膚仰天號哭恨生之有外心也立誓生生世世決不與薄情郎共衾枕矣如是者數日然獨行踽踽轉覺無聊薄晚臨窻見羣鷗戲于水濱忽長歎曰物猶如此速令郎來生匍匐至自謂雌劍必入予腹矣及相見嫣然一笑生喜出望外不意今生復有此晉接因絕口不言小紅事

空明子文集上卷
婦喜曰若果不思小紅吾願與郎永相好也言未既見
小紅蓬首垢面而來曰吾得請於帝矣令鑽入汝胸食
盡汝心而死向口中一跳而入婦大聲呼痛迷而不醒
生急救之少焉而瘳是後每欲行歡輒以心疼而止不
數年秦女亡生乃得將小紅遺柩葬之貞娘墓側好事
者多白衣冠以送之云

慎微上人重建延恩講院碑文

延恩講院即昔之祭江亭也守臣劉君爲之請額創始
於律師元偉重建於越僧可立自宋歷元及明屢興屢
廢郡志可考我松向號水鄉當震澤之下流以故宣歙
諸水滾滾東注而匯而出諸海又因郡治濱海潮勢衝
激莫可遏而古浦塘適當薛澱泖谷之衝水益湍急故
雲間第一橋下雖慣於操舟者至此未能視之若康莊
也我松又爲財賦重地每歲十月中漕艘首尾銜接俱
泊於橋之左右其所運者皆天府稻粱也必由湖泖泛
大江浮淮河而北上啓行之際例於院內設祭以賽神
歲以爲常但日月既久棟宇摧敗有上人號慎微者仰

觀俯視思所以更新之於是不私已有將所積鉢貲庀
工鳩料不三月而四方之樂助者甚衆未幾告竣嗚呼
異矣苟非其德行之足以感人能如是乎上人精於釋
典兼通儒理平生著作高邁絕倫從不作蔬笋語新殿
落成規模雄壯行見孟冬之月漕艘環集復循舊例設
祭於此仗佛力之廣大一帆風送廿萬漕糧直達無阻
其有關於國計爲何如哉予素喜上人之能文又喜其
才之足以起廢如此故略敘其梗概俾後之子孫知上
人之功當不在元偉可立下也

空明子文集下卷

壽春兄鐵岡先生選

華亭張 榮景桓著

爭論 有敘

空明先生司訓崇川己亥孟冬學使者於蓉城考校多
士先生與焉左右執役者語言失禮先生力爭之甚至
微色發聲學使者默默或人不察遂以爲與學使者爭
也先生曰苟不悖於禮即與學使者爭又何不可於是
搖筆伸紙爰作爭論

或問於予曰以司訓而與學使者爭禮歟對曰胡爲其
不然也孔子在朝與上大夫言閤閤如也與下大夫言
侃侃如也委贄爲臣便思矢公矢慎上不負朝廷下不

負所學事有曲直理有當否邦有道危言危行又安在
其不可爭也曰得毋以下犯上乎對曰非也君有諍臣
則君無過舉父有諍子則父鮮違德士有諍友則士不
失令名古人明訓班班可考若此者亦得謂之下犯上
乎人非聖人孰能無過加我數年五十以學易雖在孔
子尚且不敢自居於無過之地况萬萬不及孔子者乎
曰君子無所爭何謂也對曰自兩儀既造乾坤立焉陰
陽既分晝夜位焉天清地濁晝明夜暗君子於此卜消
長焉夫事有兩端邪正是也出乎此則入乎彼幾希之
存即人禽之別也故君子謹身制行因物付物一遵乎
理有可以爭者有不可以爭者不可以爭而與之爭是

之謂躁可以爭而不與之爭是之謂懦懦則弱躁則妄
妄與弱均非君子之道以之自立尚不可何況在官乎
一徵之孔子夾谷之會嘗與齊侯爭矣媚竈之間嘗與
衛大夫爭矣鳴鼓而攻嘗與季氏之宰爭矣再徵之孟
子與惠王爭則曰亦有仁義而已矣與戴盈之爭則曰
斯速已矣與陳代爭則曰枉尋直尺亦可為與總之君
子之爭為道爭也要非世俗之所共爭者也君子之於
名弗敢希也則無所爭君子之於利弗敢干也則無所
爭獨於綱常名教之地擔當負荷一有可爭毅然勃然
以不得不爭之心舒不敢不爭之論立不忍不爭之品
凡此者皆為道爭也故無所爭者君子之養無爭而必

有爭者君子之氣其爲氣也所以塞天地配道義維廉
恥振風俗者也曾子曰自反而不縮雖褐寬博我不惴
焉自反而縮雖千萬人我往矣此氣之所以長伸於天
下而道之所以長行於天下也臨事不惑事至不撓則
君子之素養可知矣矧貴與賤朝廷之大防也亦天下
所共見共聞者也無官不貴無役不賤豈學使者可得
而倒置歟言與德立身之常經也亦天下所共見共聞
者也無言不酬無德不報豈學使者可得而禁止歟果
能一念不欺各當其可自然人心悅服司訓亦何所庸
其爭哉蓋司訓之位雖微而司訓之責甚重何則論其
位不過與府史胥徒同其卑陋已耳若論其責則敦詩

說禮講讓型仁敬老尊賢化民成俗使賢者俯而就
不肖者跂而及誦孔子之言守先王之道育英才端士習
以爲異日平治之用豈苟焉而已哉蓋司訓者亦奉
天子明命以來秉鐸一方者也苟居之不以其道雖樵
夫牧豎皆得以狎侮之如其道王公大人方當敬禮之
不暇又何有於學使者若司訓而苟且自安甘心枉已
奔走之奴隸之亦曷足惜司訓而能飽德於身培植士
氣學使者宜乎虛衷以詢之使之肅風紀正名分辨等
威別臧否豈不甚善而顧乃勞司訓之爭至司訓爭之
而不答又力爭之以驚衆司訓之心有大不獲已者矣
猥曰下犯上乎或人斂衽而起逡巡避席降階長跪北

面稽首曰東野鄙夫不識高厚今始得聞君子之名論
矣請修弟子之禮三叩而退

希聖篇

聖人之所以教人者二帝三王之道也二帝三王之道
所謂歷萬世而無敝者也故常人非此無以樂樂而利
利賢智非此無以希聖而希天此可見聖教之大而凡
天下後世爲我同胞之民者孰有能出其範圍者乎夫
聖人之教顯之爲三綱五常之德微之即身心性命之
學若但能明身心性命之學而不能行三綱五常之德
此釋老之輩未可以謂之人若但能行三綱五常之德
而不能明身心性命之學此事功之流亦未可以謂之
道士而無志于聖道則已苟有志于聖道要當合內外
而一致兼德業而無偏然後可然而此事又未可厚望

之天下後世也苟強人以必知強人以必能是率天下
而生其驚怖之念重其疑畏之心矣孔子曰民可使由
之不可使知之張子厚曰以衆人望人則易從即中庸
所云登高自卑行遠自邇之意也聖人之心公故雖鈍
如曾子而傳以一貫未嘗以質魯擯之聖人之道公故
雖不受命如子貢而亦傳以一貫未嘗以貨殖輕之宜
乎冠絕古今參天地贊化育賢于堯舜邁禹湯文武而
爲獨盛者乎夫聖人一身天地之所寄也萬物之所屬
也倫常之所繫也故天地不能自位賴聖人以位之也
萬物不能自育賴聖人以育之也倫常不能自正賴聖
人以正之也老者安之朋友信之少者懷之使鰥寡孤

獨無有一夫之不遂其生此聖人之道是即聖人之教
也聖人視天下爲一家男不爲婚女不爲嫁聖人之心
戚然不安矣聖人視天下爲一身手不能展足不能舒
聖人之心憫然不快矣故天地大父母也聖人則天者
也亦一大父母也故適衛之時則有庶哉之歎既庶則
繼之以富既富則益之以教聖人之心真天地之心也
然其爲民之計必自富之始况富之有益于國家多矣
有若曰百姓足君孰與不足百姓不足君孰與足蓋有
若之言不過欲君民兩足而非有他也夫庠序之設原
爲教民興行也然未有溝壑是憂而能稱仁道義者也
夫亦可以知養固必先於教矣而養之之道尤莫善于

井田今以井田之制言之九夫爲井井間有溝四井爲
邑四邑爲丘四丘爲甸甸方八里旁加一里爲一成成
間有洫其地百井而方十里四甸爲縣四縣爲都四都
方八十里旁加十里爲一同同間有澮其地萬井而方
百里百里之間爲澮者一爲洫者百爲溝者萬既爲井
田又必兼備溝洫溝洫之制夫間有遂遂上有徑十夫
有溝溝上有畛百夫有洫洫上有涂千夫有澮澮上有
道萬夫有川川上有路萬夫之地蓋三十二里有半而
其間爲川爲路者一爲澮爲道者九爲洫爲涂者百爲
溝爲畛者千爲遂爲徑者萬此井田之舊制也孟子曰
請野九一而助國中什一使自賦其外如深谷峻山亦

可因地度田計畝均授而變通之法亦惟其人之善於
潤澤焉爾後之人誠能遵聖人之道舉而行之使之家
給人足戶協屢豐自然仁風洋溢太和之氣充塞于宇
宙間矣然後興其學校慎選師儒教之以仁讓沐之以
詩書彼孝弟忠厚之旨油油自生不自知其手之舞之
足之蹈之矣其俗有不唐虞三代者哉故凡士之願學
聖人者務期探索六經旁搜子史嚴以持躬恕以接物
毋枉已而徇人毋懷寶而遁世親親仁民仁民愛物不
畏強禦不侮鰥寡處則獨善其身出則兼善天下行矩
言坊弗欺幽獨正心誠意格物致知將天地翕闢之微
妙鬼神盈虛之消息日月度數之運行星辰經緯之錯

綜風雷激蕩之變幻九州萬國之異宜山川人物之各
別鳥獸魚鼈之咸若昆蟲草木之羣生尋原究委弗得
弗措然後由文章之末以講求性天之理誠能如是雖
未敢即謂之聖人我必謂之聖人之徒也已

歸途述

予自巳亥五月二十四日蒞任崇川至庚子三月二十
六日告假謝事總而計之食俸十月其間之奔走公務
者三月有奇就鑿郡治者又約計兩月所以在崇辦事
未及半載何以崇之紳衿耆老信予之獨真也身本寒
儒謬膺茲職布衣疏食甘之有素自愧身列儒官莫可
報稱因念舉節舉孝培養士氣衡文講武分所應爲故
不自知其不可而毅然以身任之而不辭但求免於罪
戾弗欺幽獨已耳豈期憲臣之敬禮頻加士庶之推崇
特異清夜自惟惶悚無地正思求退不意又有以匾額
送入明倫堂者一則曰泰山氣象一則曰人倫模範予

聞之愧謝不敢當却之弗聽又婉轉致詞恐難爲繼起者况身當辭職毋令他人竊議其後也不若載之歸里置之堂中以示子孫使之有所觀感勉爲正人併弗忘君等相愛之意於是羣然聽命予即一肩行李徒步登舟但見飛蓋遙臨旌旗雲集冠裳疊至折柳河橋話別情深不勝悽惻豈無高士贈我長篇亦有才人裁成美錦翩翩裘馬盡屬門生無小無大咸親色笑羣來遮道白叟黃童極口銜恩窮孀義僕甚至柳營多士連袂來前無不竚立海濱望舟遙拜吞聲揮涕翹首天南此極一時之盛事抑亦千載之竒逢也繾綣之私正難自己無柰布帆一挂海水茫茫眼底迷離都成幻境倚檣危

坐不覺漸入睡鄉見有一馬盤旋左右玉質朱斑噴煙噴火騰身高跨但覺捲霧凌風瞬息萬里歷龍宮經海藏珍寶雜陳莫可名狀殿上有一明珠光彩奪目照耀四壁予攬轡之下口吟一絕云玉虬飛下水晶宮萬丈蛟綃覆碧空我本玉皇文案吏翻身何處覓崆峒正舉首間望見千仞高山削立雲表絕頂坐一道者呼予曰鶴髮翁來何遲也予一鞭直上睥睨其旁俯視大壑中有積塊若碁置然道者笑指謂予曰此一撮土是汝中華之地予細玩之雲煙冥冥杳不可辨豈料十洲三島外又有清虛紫府引入勝若此俄而威鳳和鳴祥麟率舞仙女散花五色迷亂目不暇給樂而忘返忽聞海

若一聲礮濤拍岸午夢乍醒長年收柁回頭西望幻影
難測落日銜波海天一赤滾滾東流曷其有極追維前
夢非離非即解夢者誰具大知識

題崇川楊雲書養正篇卷首

天地之道一陰一陽生人之道一邪一正出此入彼間
不容髮甚矣正之爲義不可不亟講也故聖人稱舜之
無爲則曰正南面而已矣康子問政則曰政者正也子
率以正孰敢不正鄉黨一書記之曰席不正不坐升車
必正立執綏割不正不食君賜食必正席先嘗之然後
知聖人一生無事不準乎正甚矣正之爲義大矣哉然
其端必自蒙養始楊子有鑒於此爲取弟子入則孝一
章條分縷析諄諄三致意焉名之曰養正篇有以也楊
子三歲喪父賴有節母黃氏茹藥飲水丸熊畫荻即能
潛心力學弱冠採芹研求誠意正心討論克己復禮著

述等身四知自凜白頭純孝遠近同稱猶念孀母苦節
四十八年雖蒙當事筆之邑乘但未邀建坊旌表時時
飲泣開門講學一時名士多出其門下聯翩振翮者亦
指不勝屈皆能宗其師說以開後覺令子松年謹呈父
書求敘於予予卒讀之恨楊子之生不我同時也抑何
其闡發聖義有關於世道人心若是乎彼夫巖戶窮經
之子僅知錦繡其文富貴不難吐手而得又安知所謂
崇實黜華反本求誠之大道哉獨茲篇之爲弟子立說
也循循善誘感動其固有之良知良能文者質言之以
開其蒙精微者淺言之以暢其義自孩提以至成童使
之心領神會身體力行以歸於至正然後邇之事父則

必爲孝子遠之事君則必爲忠臣孟子曰所謂大人者
不失其赤子之心者也其有功於來學豈淺鮮哉今松
年有弟曰松齡俱本邑庠生鬚髮亦漸斑白講業受徒
閉門樂道孝友性成一遵先訓每來謁見談及往事未
嘗不潛潛淚下其至性之感人有如此若松年者可謂
善讀父書者已楊子諱天禎庠姓董字曰雲書雲書有
三子長曰松年字鶴朋次曰松齡字蒼巖幼曰松壽字
介眉早卒崇川人氏也

育嬰堂徵信錄書後

天地一大父母也人日在覆載之中而不知天地之育我也王者父天母地利濟爲懷愛養羣黎若保赤子亦一大父母也宜乎家給人足一道同風和氣流行四方嚮化親愛其子子孝其親何至有生兒不育視嬰孩若讐敵者乎諺云虎狼尚且不食其子若溺子之輩可謂天性滅絕直禽獸之不若者矣乃有富室長者設立一堂收遺嬰而胥育焉一人倡之衆人和之羣然譽之不容口而愚竊惑焉試問今日之爲民牧者能仰體皇上帝上愛民之心使之衣食無憂仁風翔洽否爲士大夫者能於三黨之間濟困扶危矜孤恤寡否而獨於育嬰殷

殷加意焉毋乃舍其本而末是務歟孟子曰親親而仁民仁民而愛物此其故不可不思也然而其事未始非善事也其心未始非善心也誠能擴充其量爲民牧者以育嬰之心育我庶類則耕九餘三家登仁壽爲士大夫者以育嬰之心育我三黨則安居樂業人慶長年自然戶協屢豐孝慈兩盡又安有嬰之可育哉即欲求一嬰而育之恐亦未可得矣故我謂育嬰之心誠善心育嬰之事誠善事要不若胥天下而有是堂竟虛無一嬰之可育焉則庶幾矣是所望於有位之君子

羣鴉噪堦喻

句容之崇明者故晉司空晉舍宅爲寺者也建堦於寺中簷鈴遇風有聲錚然蓋佛家欲以此壯觀也時移事改廟貌傾毀馬踏閑庭遊人寂寂予至其地欲登堦以望金陵觀所謂龍蟠虎踞者侍者不可予叩云何侍者曰寺之東學使者之公署也其西則縣令之居也踞其巔其室家之好無不悉見因是而堦遂鎖訖予曰嘻悲夫此堦之所以爲鴉之寓居也凡人不至者物所聚此理之固然無足異者然而鳥之爲類三千而鴉之聲最賤聽之者鮮不以爲可怪而惡之夫以衆所惡之聲而日夕噪其上呼羣飼子驚恐夢寐人之不幸耶抑堦之

不幸也且塏之中有物憑焉所謂諸天菩薩者彼噪之者衆則其爲穢也諒亦不少塏之不幸耶抑佛之不幸也何以塏固安之自如佛亦安之自如卒不能驅之去以絕其惡聲污穢之所及豈其力不足以拒之耶抑任其噪而若不之聞耶且喜其聲愛其穢而相與習之耶不然曷昧昧也佛經有云耳根清靜夫所云耳根清靜者將惟是跌坐於深山窮谷人跡不至之處然後謂之清靜也寧有聚羣鴉而朝夕噪之者哉吾於此有感焉佛蓋西方之聖人也猶吾中國之有孔子也佛之置羣鴉而勿問猶吾孔子微服而過宋也子曰不曰堅乎磨而不磷不曰白乎涅而不緇佛之受噪於羣鴉其胸中固有不屑與較之意和光同塵其殆佛家之兼愛矣乎然鴉亦可以愧謝夫塏矣而鴉何知也方將爭噪不已自以爲得計亦云悞矣夫鴉至渺小也天下之人至衆且多也吾恐五陵年少裘馬翩翩持弓挾矢發一中百此時雖悔之亦且不及即欲與塏長辭飛鳴遠引尚可得哉尚可得哉然則世之與塏爲類者可以自安其素守矣彼同乎鴉者曷不急改其過速遷於善庶不至爲他人所擊哉

叅三說

空明先生既至蓉城之明日興居學憲歸坐無聊掩戶
開卷神思焦勞楓葉蕭蕭於天末雁聲嘒嘒於江臯四
壁蟲聲刮耳半窻月色翻濤呼童洗醖酌我芳醪一斗
便醉睡魔相邀睡未片刻聞焉人寂殘燈無焰光閃枕
蓆予披衣起納履行覺空中有人戶外有聲少焉入室
二豎縱橫不知其從何而倏至但見其圓目而豎睛一
豎輕輕欲語一豎默默無言一豎拊耳接談一豎點頭
誠然其言曰胸中是我窟穴腹內是我園田勾人一命
疾如風雨嘗君五臟曷用醯鹽八珍豈及百味能兼食
不過費取不傷廉我據在育之下爾據在膏之巔神通

小試雖扁鵲見之而不敢爾乃月陰之夕出沒其間有
影無形隱於桂殿不類鼠鬪或同龍戰佳人遇而却步
勇士逢而按劍我乃御風而行應風而鳴淒淒戚戚杳
杳冥冥魂遊清虛之府夢斷芙蓉之城召賦玉樓則我
豈敢修文地下與爾聯盟貴則王侯次則公卿爾我一
到膽喪心驚孝則竭力忠則立名爾我一到飲血吞聲
俠並崑崙美似飛瓊爾我一到性命俱傾逆我者死順
我者生來同鷹隼去若雷霆悲涼野火慘澹常青且任
浮雲之變幻呼吸天地之精英聊逍遙以容與與終古
而同情言畢二豎大喜予聞其言不覺髮指轉怒爲謔
越席而起藜藿久虛慕爾甘旨請揖二豎可追芳軌嗟
爾二豎出此入彼何用不臧盤餐盈几吸髓吞膏亦云
樂矣能參我爲三容我從旁礪齒乎二豎伏地不知所
以稽首請罪豈敢相累公君子也正直自矢我儕小人
未識廉恥猥瑣齷齪愧死愧死

先兄補三先生事狀

予同祖兄弟十有一人少宰居長兄行二同父兄弟四人兄居長兄諱蔡字芳苑號補三生於上海之三林鎮先母常告予曰汝兄初生時汝父最爲珍惜六齡就外塾日誦千言十五英英自異文亦豪放可喜同輩推重至今予猶能記憶兄年十八娶薛氏嫂勤敏精幹嚴以御下操家井井有法親黨稱之二十後遨遊四方車轍所至輒多名作至如金臺十咏闕里一篇尤爲堂皇冠冕卓絕千古平生雅好清談議論丰采能令淳于屈辨曼倩避席庚申歲蜀道猶梗思欲請纓闕下以繫逆臣之首得缺某州別駕適遭蓋修三兄之喪因念兩親年

老雖尚有兩弟在家然正當潛心力學未經力鍊遂決
意挂冠歸里慷慨就道及抵家兩親安焉丙辰生二子
長曰應龍次曰師實及長延名師以訓誨之上而事親
下而教子歷有年所戊辰先君子捐館兄不茹葷不飲
酒者逾年諸凡附於身與附於棺者不敢稍自寬假應
龍師實俱能克振箕裘有聲膠序至戊寅先母遭變兄
亦年及半百矣寢苦枕塊哭泣弗衰服除絕意仕進詩
酒適情和易恬淡人樂親之故自公卿以至士庶無不
歎曰此清河氏之古君子也常謂予曰我弟真爲惠連
老兄獨慚康樂能無愧乎其謙光有如此者至古稀時
猶好學弗倦日相砥礪與薛氏嫂親理家政以期二子

之樹立孰料陡患痰疾四五年間卒不能愈辛卯歲應
龍師實應試金陵竟於八月某日病故歿之後越日二
子歸始就含斂嗟乎嗟乎如我兄者旣不能大用於世
以展長才又不獲覩二子之一鳴驚人良可痛悼薛氏
嫂又隔八載已亥歲三月某日去世應龍師實勉力營
喪事兩尊人之棺尚在正寢方將擇高壤以葬之然俱
志趣高遠騰驤可卜九原有知可以無憾已

文學麟書陳君暨張孺人合葬墓誌銘

君諱楨字維周號麟書婁縣庠生自始祖太僕公而下
數傳至君之祖熙卿益鴻其緒迨君之父電發爲上邑
諸生恬淡養靜鄉里稱爲長者生二子君居其次幼攻
舉子業未弱冠雄文浩瀚淹雅絕倫電發公鍾愛之欲
擇佳偶遣冰人踵先君子門願聯秦晉先君子亦以愛
女故三四往返始訂姻好是時君年一十有四先姊年
一十有六越三載成嘉禮君與先姊侍兩尊人前朝夕
問起居甘旨必修潔兩尊人顧而色喜每謂人曰得此
佳兒佳婦我兩人晚景其稍慊乎孰料兩尊人相繼亡
去哀毀盡禮三黨稱之無何徙郡治依先君子側事外

父母不啻其事兩尊人也與予兄弟頗歡好無間亦不啻其待長兄也閉戶讀書動必以禮先姊爲之勤女紅親中饋以克相夫子稱生一子名曰炳方期黽勉有成不意君染異症經月病益甚先姊衣不解帶囚首垢面奉侍湯藥君病稍愈姊病已深鑿禱莫效竟致不起嗚呼痛哉君即逍遙物外不理家政未及三四載家業頓消先君子不得已收養遺孤先母撫摩鞠育見外孫如見愛女焉十有餘年勞苦備至君又續娶杜氏來往少踈學亦荒廢杜氏又生三子迨長子炳成立始歸君家聯姻葉氏復徙於鄉先君子先母前後去世地隔百里音問卒歲不一兩至方將冀君之恢復祖業堂構式廓

及晤炳甥知君之蕭條特甚徒以筆墨自雄一鳴其牢騷不平之氣亦可悲已晚年益無聊賴賫志以歿長男炳年少老成稍能樹立以下三子雖各婚娶而貧困異常歿後一載擇地營葬兼爲杜氏造生壙又幾年杜氏亡即祔葬焉葬畢爲之銘曰

潁川仲君生長百曲爰彼清河有女云淑載好其速雍雍肅肅事親克孝潛名林麓胡天不仁不享遐福琴絃早斷既絕復續放浪形骸禮法莫束一跌不振奄奄就木葬爾荒丘墓草幾宿子孫林立森森如玉百世烝嘗勉旃爾勗

候選儒學教諭赤霞吳君暨張孺人合葬墓誌銘

教諭吳君者諱文煒號赤霞向爲新安巨族四世祖宦於松樂其風土遂卜居於青溪之崧子里因寄籍焉家世素封敦睦親黨鄉里推重及再傳至君之父伯源公益大其業徙居郡治號爲富室伯源公初娶沈氏生子繼娶馮氏生君君行第三幼而好學天分過人形體復魁梧竒偉伯源公鍾愛之母夫人尤爲珍惜年十七補博士弟子員明年循例以歲進士授儒學教諭旋丁外艱歸里哀毀幾至滅性遠近稱之服除娶張氏爲華亭貢生爲章胞妹夫婦相敬如賓奉事母夫人克盡孝道未幾因闕墻之隙連歲不寧君能以恬澹處之卒莫

能害至癸酉君年三十有二孟春忽患病纏綿牀第者
幾兩月至三月二十日竟不起是時母夫人幾不欲生
張孺人年始三旬死而復蘇者再親黨俱以姑老子幼
勸阻之孺人始日飲粥數口以延殘喘伯氏因宿憾未
能忘情每欲乘機下石孺人當茹荼集蓼之時孝養病
姑冬溫夏清昏定晨省十餘年如一日能以婦道而兼
子道下撫弱息敦請名師朝晚課誦丸熊截髮動以禮
法相繩又能以母道而兼父道周全三黨餽遺無缺御
下以寬待人以禮其一生之節孝慈可敬有如此苦遭
回祿堂構維艱禦患恤災勤勞備至老姑臨歿每謂人
曰我子雖亡有媳如是可瞑目矣既歿居喪盡禮獨
力營葬又經理佳城葬赤霞公於吳淞江之北三子婚
娶悉遵家禮謝絕紛華敦樸是尚人方期孺人含飴弄
孫克臻上壽以酬一生之苦節豈料年未六旬遽而去
世也歿之日即合葬於赤霞公之新阡焉生三子長維
熊次維秬幼維申俱入太學孫男幾人孫女幾人予之
內子爲赤霞公之嫡姊張孺人又爲予之族妹三子之
請於予者懇懇而切至誼不容辭故爲之銘曰
吳淞之陽道阻且長震澤東注浩瀚汪洋清溪一曲白
鶴南翔大陸高阜鬱乎蒼蒼卜其宅兆終焉允臧俾爾
子孫永世不忘

先兄蓋修先生暨陳氏孺人墓誌銘

有客從峰泐來者告予曰八峰之麓在彼震方隔溪對
景鬱鬱蒼蒼此誰氏之墓道也予曰噫嘻此殆我兄我
嫂之永宅乎坐我語汝昔我先祖來自中州至於海邦
世德作求洎乎高曾益壯其猶筠溪卜宅牖戶綢繆迨
我王父靡闕不補強禦不畏鰥寡不侮暨我先君居今
稽古十畝閒閒爰得我所生子四人兄居其二童年早
慧穎敏特異年未十五五經鼓吹北走金臺投時利器
三年不飛旋整歸騎齊魯訂交俠烈把臂名滿四方雲
霄翡翠裘馬翩翩坦腹潁川冰清玉潤人無間言造舟
爲梁桃李鬪妍于歸之後執禮莫愆聿修婦道四德俱

全父母具慶共樂華年獲此嘉偶如兄如友志在弧矢
豈肯株守檢點行裝酌以杯酒辭我高堂別此少婦載
馳載驅豈爲升斗微祿及親志願已久一官淹遛將誰
之咎肅肅南征如怨如驚日月云邁俟河之清回首北
望憂心怵怵依親膝下甘旨是營閉門謝客學期大成
連舉二子頭角崢嶸老親色喜價擬連城倡隨好合和
氣方盈豈期中道玉樹摧英兩親飲泣兄弟吞聲未亡
欲殉隕涕成冰二子懷抱朝夕煢煢歸寧父母不遑遄
征自冬徂春終殞其生人孰無死死貴光明太山之重
鴻毛之輕嗟我嫂氏克全其貞歿後廿載二子有成地
卜赤壁西山雲橫牛眠馬鬣以樹鴻名客揖而退爰繫

之以銘曰

我兄去世幾四十秋嫂氏云亡不隔一週煜煜兩姪乳
抱是謀迄今成立爰葬高丘歷年久遠淹沒爲憂欲詳
行實惟我用求兄名曰棊字曰蓋修位居別駕未展嘉
謀厥配陳氏實命不猶夫婦早逝哀此好逑遺孤克肖
早驟驂騶或出或處或剛或柔墓門華表兄嫂來遊赤
壁之麓比茂松楸

亡弟蘇山先生墓誌銘

君初生時予始六齡猶記先王母趙太夫人抱汝向我
先母而言曰是兒日後聰明必能過人但恐未能享遐
壽耳先母亦以爲然及長日讀四子書一兩行猶覺艱
苦衆共輕之而予獨諄諄訓誨不倦迨年一十有三穎
敏特異下筆成章而議論頗覺娓娓可聽先君子每多
予之能教而樂君之可以有成也十五入泮十六觀場
南省人咸異之嗣後困於病不復能振作學業亦中止
但志趣太高好爲畸行以驚人耳目然苦於力有未逮
娶袁氏夫婦相得不及數年先君子去世未幾袁氏亦
物故而君乃疾病纏綿奄奄終歲服除以明經授教職

繼娶董氏經營拮据先母之爲君勞瘁者亦至矣生一子名之曰焦旁人不解其何謂予笑曰無庸問彼有取爾也其平生之好奇有如此或問命名之義蘇山曰枯焦俱屬惡字身既枯矣子安得而不焦乎予在座曰非也君因回祿之後取科塲弗火燒安得狀元焦之意爾蘇山笑而不答然此名總覺可戊寅先母長逝君疾益甚雖不免晉人之風度然不削髮者亦幾三載里黨難之無何董氏一病不起撫此哀子其何以堪於是奔走道途賦詩乞食逢人自况竊比陶潛越歲續娶許氏又生一子甲申冬君即告殂幼子亦復早殤嗚呼痛哉長子焦予爲之改名曰烺明年即卜地余山之陰偕袁氏董氏合葬焉并爲許氏造生壙既葬之後爲之銘曰

君名棻字齊軾號蘇山鬚如戟仿髯翁最愛惜着鬚囊時脫幘出大言浮大白一再娶鴛鴦隻命不辰常蹙額續高陽中道拆幼子殤慘何極遺孤寡痛肝膈欲相殉又奚益營佳城余山北土一堆紙一陌往與來盈千百誰識此有靈魄地下人文章伯

